

१३८

दर्ता नं.:४८/२०७६/७७

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



नेपाल संवत् १९४४ बछला गा: / २०८१ जेठ १५ / 2024 May / ल्या: १०८, दौं:६



स्वप नगरपालिकाय् जनप्रतिनिधिपुं
बहाली जूगु नेदा फुत

जापान ओइजुमि नगरया प्रमुख तोसिआकी स्वप नगरपालिकाय्
(२०८१ जेठ ३ गते)



पोखराया जनप्रतिनिधीपुं स्वप नगरपालिकाय्
(२०८१ जेठ ९ गते)



; DkfbSlo

@*! h7 !%, c^a\$!#\$, jif{^

शिक्षाखय् बजेट अप्वः तय मःगु

नेपःया सरकारं जेठ १५ गते बजेट पिब्वइगु जुयो च्वंगु दः । राष्ट्रपति पाखं पिब्वगु सरकारया नीति व ज्याइवः प्रतिनिधि सभाय् विपक्ष दलं पांक पांक हे पारित याता । सहकारी प्रकरणय् गृह तथा उपप्रधान मन्त्री रवि लामिछाने नं दुथ्यागु धायो संसदीय छानविन समिति द्यकेगु माग तयो नेका नपांया संसदपिसं संसद हज्याकय् मवियो च्वंगु दः ।

सरकारपाखं पिब्वइगु बजेटय् शिक्षाता हदाय तयो बजेट छखय् लिइके मःगु माग जुयो च्वंगु दः। शिक्षाखय् गाक्क बजेट तःसा जक सरकारया नीति व ज्याइवः छ्यलय् फैगु खाँ धायो च्वंगु दः। 'छगू पालिकाय् छगु स्मार्ट विद्यालय' छ्यलय् ह्यगु, आधारभूत तगिंया ब्वनामिपिन्ता भिंगु व ताजा खाजाया व्यवस्था याय्गु थजगु खाँत नीति व ज्याइवःसं न्हि थाड तःसां संविधानं धायो तःकाथं हिन्यगू तगिंतक धेबा म्वायकः निःशुल्क शिक्षा बियगु खाँ धःसा गनां न्हि थाड तःगु मरु ।

थुगुसीया बजेट थयं मथयं १८ खर्बया वइला धायो च्वंगु दः । उकिमध्ये शिक्षाया लागिंजक २०६ अर्ब छखय् लिइकिगु धायो च्वंगु अलय मा.वि. तगिं तकया लागिं १५० अर्बजक छखय् लिइकिगु प्रारम्भिक अनुमान खः ।

अन्तर्राष्ट्रिय मापदण्ड काथं मुक्क बजेटया २० प्रतिशत बजेट शिक्षाया नितिं छखय् लिइकेमःगु मान्यता दः। नेपःया सरकारं शिक्षाया लागिं १०/११ प्रतिशत जक खर्च यायगु याडः च्वंगु दः। धात्थें विद्यालय शिक्षा निःशुल्क याय्गु खःसा मुक्क बजेटया २४ प्रतिशत तुइगु सभें धायो च्वंगु दः।

सामुदायिक व संस्थागत याडः नेगू काथंया शिक्षा दःतलय् निःशुल्क शिक्षा खोक्रो नारा जक जुयो च्वनि । संविधानं निःशुल्क शिक्षा बियगु पक्का यागुलिं संस्थागत ब्वनयकुथि शुल्क काय दै धाय्गु मखु । संविधानया मति व मखु । संविधान व आधारभूत नपां निःशुल्क शिक्षा ऐन २०७५ काथं १२गू तगिंतक निःशुल्क याय्गु जिम्मा सरकार याय्गु खः। शिक्षाता ब्यापारया रूप बियोच्चमहा सरकारं कानुनता खःकाथं छ्यली धाय्गु विश्वास याय फैमखु ।

नेपःया सरकारं न्हपानिसेंहे खूगू तगिंतकया फुक्क ब्वनामिपिन्ता खाजाया बन्दोबस्त याडः वगु खः । वांगु दायँ डागू तगिंतकता जक खाजा खर्च बियगु दक क्वःछिता । उकिं बांमलाक लिचवः अपलं स्कूलता लात । ख्वप नगरपालिका दुनय् चाय्कः तःगु सामुदायिक ब्वनयकुथि सरकारया बजेट यक्व हे म्हवचादक दता । ख्वप नगरया ब्वनयकुथि १८० दिन स्वयो अपः ब्वनेकुथि चायकिगुलिं अपः खाजा खर्च जुयो ६५ लाख तका नगरपालिकां ताडः बिय माल । फुक्क ब्वनयकुथिता अथे याय् नं फैमखु ।

संविधानया मति काथं निःशुल्क शिक्षा बियगु खःसा अःपिब्वइगु बजेटय् मुक्क बजेटया म्हवचा नं २० प्रतिशत छखय् लिइके मः ।

पिकाक-ख्वप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६१३०४३, इ-मेल- khwopapau@gmail.com



का.रोहितया चीन यात्रा

अलय विश्वास घाती चिनस्वे पिनिगु इवातांता स्वयो थुकलं बिई घुणा याई ।

म्हासुगु बज्र (मना) व ड्रगन गुफा: पाउ शिह शान पहाड्या उत्तरी भागय् च्वंगु थुगु बज्र व गुफाय् आनाया ल्वहंत व हितिता ड्रगन (हायली) या पहः (आकार) ज्याडः दयक तःगु दः। आनानं यचुगु नाः हाय्क, तःगु दः । श्व भीगु ल्वहँहिती थें खः । भीगु ल्वहँहिती बांलागु कला ज्याड, छायपियो तःगु दै अथेहे थानाया गुफा नं छायपियो तःगु दः । ड्रगनया क्वय पाख्य बःचागवगु दहचा छगू दय्क : तःगु दः । आना छम्हा द्योया मूर्ति नं दः । आना तस्कं बांलाक छायपियो हायँपुकः तःगु दः । प्यख्यरं वाउँसे च्वंक तयो तःगु दः । आना जिमिसं छपा नेपा किपा नं काया ।

चिङ्ग लिन देग: थुगु देग ता उच्चान देगःकाथं नां दां । आना चिच्यागवगु पुखु छगः नं दः प्यख्यरं ल्वहँ तं सियो तःगु दः । उकिया दुनय् नं चिच्या चिच्या हांगु नाः या फोहरा थें नाः थाजायो च्वंगु दः । श्व ४८२ सनय् दयकगु खः । थुकिता 'मोती फोहरा नं धाई । श्व प्यकुंलागु पुखुया दथ्वी चिच्यागवगु देगः छगः नं दः । आना म्हासुपुं डा त चुलुबुलु जुयो म्हेत च्वंगु खानय् दः । थुकिता भिंगु वंशया पालाय्गु (१५५५-१६३६ सन) छम्हा लाहा जःम्हा तस्कं ज्या सःम्हा कालीगढं तुड चि चाडं तस्कं बांलागु छगु डाय्या आनन्द्या अधिराज्य दक च्वयो तःगु दः । सुजद्योया जलय थाना वैगु नाः या फोहरा स्वय बलय तस्कं आनन्द, बांला ।

लिन इन देग: श्व छगः तस्कं बांलागु देगः खः । सन ३२६ स्वयो न्हा व चिनवंशया शेन हो या पालय् हुइ लि धाय्म्हा छम्हा महंतं दयकगु खः । १६०० दाय्या इतिहासय् थुकियाता अपलं ल्ववनय्-कानय् याय् धुकल । थुगु देगः लिन इन नांया पहाड्य दय्क तःगु खः । उकिं थुकिता लिइ इन देगः दह जक नां दां । श्व देगः हाङ्गु चाउया दकलय् तः हांगु बौद्ध देगः खः । चिङ्ग वंश (सन १६४४-१६६१) या शुन चिहया पालाय् ३३.६ मि तः चाय्क दय्कगु खः । अलय न्हँगु जनसरकारं ऐतिहासिक व पुरातात्विक थाय् व आनाया बस्तुत ल्यंकः म्वाकः तय्ता छगू ल्ववनय्कानय् याइगु पुचः छवयो ल्ववनय् कानय् व दानय्गु ज्या न्हयाकला , १९५६ खय् उगु पुचलं थःगु ज्या क्वचाय्कल । थुगु देगः या मू क्वथा दुनय् १९.६ मिटर तः जःगु शाक्यमुनिया तः हिकम्हा तस्कं बांलाकगु नं दः । श्व इवातां श्री खण्डया सिं खय् कियो तःगु खः । श्व बुद्धया मूर्ति तःहिक व तस्कं बांला खानय् दः । थौं तक जिं आपाहिकम्हा बुद्धया मूर्ति मखाडा नि । अथे धाय् अः तक जिं खाडापु बुद्धया मूर्ति मध्ये श्व दकलय तः ही । मूर्तिया ल्यूनय् पाख्य छपा तः पागु किपा च्वयो तःगु दः । किपाख्य तः हांगु

२० जुलाई न्हिनय्सिया जानय धुक, जिपू पाउचु पागोडा, योह फाईया देगः व चिहान म्हासुगु ड्रगन गुफा, जेड फोहरा, लिन, इन, देगः, चिन-जु देगः, बाघे मूल (Tiger spring), खुता जःगु पागोडा, युहान हिल, गुगू कुण्ड व हिच्यागू खहरे (खुसीचा) ड्रगन व्वड, तेन चु देगः व मेमेगु गुफा स्वः वाडा ।

पाउचु पागोडा :

(देगः) थुगु देशः ४३ मि. तःजः । न्हापां श्व दयक बलय गुता जःगु खः । श्वनं सन ९६८ खय् सुङ्ग वंशया काई पाउ या इलय जुजु 'चेन्चू या रक्षाया देगः' या नामं प्रार्थना याय्ता दयकगु खः । अलय शेन्स पिङ्ग (९९८-१०३ सन) या इलय न्हय्ता जक दय्कला । लिपा सुङ्ग वंश व युन वंशं नं ल्ववनय्गु ज्या याता श्व देगः चिनियाँ गुह निर्माण शैलीया पहलं दयकतःगु खः ।

योहफाई देगः व चिहानः दक्षिणी सुङ्ग वंशया पालय् (सन ११०३-११४०) उब्ले चीन विदेशी आक्रमकतनपां ल्वाडः च्वंगु ई खः यो फाई उब्लेया छम्हा नां दांम्हा राष्ट्रिय वीर खः । शक्तिशाली सेनाया नायो जुयो योहफाई थः शत्रुया विरोधय यागु लाईसं तस्कं बहादुरीसाथ दे या रक्षा याडः च्वना । अलय लिपा वाता विश्वासघाट याडः मुलय तयो गः किला हँ । देगः सन १२२१ य् दय्कल, गुगु 'इमान्दारी व बहादुरी' या देगः दक नां दां । नपां योह फाईया चिहान नपां वया जनरलपिनिगु नं इवातां दः उकिया क्वय हनय् पाख्य योह फाईया विश्वासघात याम्हा चिनस्वे व वया जहान व मेपुं विश्वासघाती तय्गु इवातां दय्कः न्याबारं खुयो कुडः तःगु दः ।

योह फाई देगः व चिहानय् चिनियाँ जनतां श्रद्धां स्व वई

सच्छिव स्वीप्यंगु स्वप पौ. ब.छि पौ(पाक्षिक)

सुमुद्रया टापु ख्य् छम्हा मचाया किपा दः । क्वथाया चाकलीं बौद्ध धर्मया सुत्रतनं च्वयो तःगु दः । च्वयया उगु किपाया मतलब ज्वी संसारया ब्यावहारिक दुःख व पीडाया महासागरं थः वच्य् जुयगु छगू जक उपाय 'बुद्ध धर्मरूपी टापु' देगः तस्कं सफा यच्चु पिच्चु धुं च्याकय्यु चलन आना नं दः । अः तक नं धुं च्याकः च्वना, मुर्तिया हन्य् । तः हिम्हा मूर्तिया हन्ये छम्हा सिंहमरमरयाल्वह्यायम्हा बांलाम्हा बुद्धया मूर्ति दः । व उगु मूर्तिया मोडेल खः । उगु नवीनीकरण याबल्य् पूर्वी कला विश्वविद्यालयया प्राध्यापक पिसं दयकगु खः । धायो तः काथं थुगु देगःया ल्हवन्य् कान्य् ज्याख्य् प्रधानमन्त्री चाउ ऐन लाइ जुं तस्कं इच्छा यागु खः । देगः या चाकलीं तः तः मागु सिमाया वाउंसे च्वंगुलिं स्वय हाय्येपुकः बांलाक ब्यगु दः । नपां देगः हन्ये लन फोहरा, ख्वाउंगु नाः या फोहरा नं दः । गुकिया न्ह्यपु याउंसे च्वंगु सः देगलय् च्वडः नेन्य् फः । थुगु देगःया दक्षिण पूर्वपाख्य् आकास्य् वानय्यु गुफा थजगु गुफा नं दः । उगु गुफाय् सुजद्यो या जः नं द्रुहें वां ।

'सर्गय् थाहो वानय्यु गुफा' नपां छगु मेगु गुफा नं दः । उगु गुफाय् बुद्धया बां बांलागु मूर्तित अपलं दयकः तःगु दः । थ्व दकलय् न्हःपां चू वंशं (सन ९५१) ख्य् दयकगु खः । धाथे थुगु गुफाता बुद्ध गुफा धःसां मपा । थ्व फुक्क वस्तु लिइ इन देगः ता तस्कं बांलाक स्वय हाय्ये पुक ब्यगु दः ।

चिनजु देगः सन् ९५४ खय दयकगु खः । थुगु देगः या अर्थ खः पवित्रता व परोपकारिताया देगः । थ्व नानपिंग पहाड्या क्वय्ये दयकः तःगु खः । चिन जु देगः चिकुड्ग धायम्हा छम्हा बौद्ध महन्तता उपहार ब्यगु खः । उम्हा महन्त तस्कं परोपकारी खः । उगु इलय वयकता मन्तयसं वें नं धाइगु ।

देगः हन्य् छक्क चुक नं दः । चुकय तुंथि छग नं दः । उगु देगः ता जादूया देगः नं धः सां ज्यू । उगु तुंथिया खाय्ये छगू किम्बदन्ती नं दः । छगू इलय थुगु देगः, मिनयो खरानी जुल । लिपा देगः दयकेता सिं व तःतः रवगु (टिम्वा) सिं नं मदयो च्वंगुलिं ज्या पाडःच्वन । अलय् चिकुड्गं अपलं ऐला च्वडः स्वचा स्वन्हू देडः च्वना । लिपा व दडः वयो धाल - टिम्वा सिं वयो च्वंगु दः । फुक्कसिनं तुंथि सिं खान । देग दान्य् मधुं तलय् माक्व सिं वहे तुंथि पिकाला । तुंथि स्वयबलय् अः नं सिं खान्य् दः ।

चिनजु देगः हन्य् छगु तः जगु पहाड दः । उकिता चिनिया तयसं सायद अस्ताचल पहाड धाइगु । थ्वहे पहाड्य् छगः लेइफंग धाय्यु देगः नं दः । थ्व सन ९६० ख्य् दयकगु विश्वास याडः तःगु दः । आना बौद्ध धर्म सम्बन्धी या अनेक लिपित नं दः ।

वनलिं जिपुं 'बाधेमूल' स्व वाडा । बाधेमूल पश्चिमी भीलया छगू बांलागु लोकं हवागु थाय् खः । न्हा धायो तः काथं छक तेपुधुं (जोडी धुं) थाना गः (गुफा) म्हाला म्हा म्हा याबलय् थाना चिच्या चिच्याहांगु फोहरा ब्यो वला । उब्ले निसें थुगु थाय्या नां

'बाधेमूल' (धुं म्हागु नाः छुं) धायो लोकं हवाता । थाना वाउंसे च्वंगु गुं, चखुं बखुंया न्यन्य हाय्येपुगु सः व सिरिसिरि फसं मन हे आनन्द याडः विइगु । थाना नाःख्य् खनिज पदार्थ अपः दःगुलिं जुई नाः धोलय् याडः तगुथें ख्वातुसे ताकुसे च्वं । गिलास जायकः नाः तयो उकि देन्य् धेबा तय् बलय् धेबा नं लुकुं मब्यु अलय् नाः नं देजयो मवा । अलय् नाः धसा गिलासया सिलिं च्वय थेंक वांगु खान्य् दः ।

नपां छगः बुद्धया देगः नं दः । गुगु ८१९ सन्य् लांग बंशया लॉन हो या पालय् दयकगु खः । देगःया ल्वहंतय् बियो तःगु बुद्धात तस्कं मिहिन अलय् कलात्मक जू । जिपुं थाना पलख आराम याडा । थाना हे चिनियाँ पासां जायक नाः दःगु गिलास्य् धेबा तयो क्यना । गुगु धेबा नाख्य् लुकुं नं मब्युसिं ल्यं ब्यो च्वना नाः नं गिलासं भयबियोमव । थ्वहे खः बाधेमूलया नाः या गुण (विशेषता) ।

षष्ठशील देगः हाइ चाउसं स्वय लाइकगु थाय् मध्ये षष्ठशील देगः नं खः । थ्व योह लुड्ग पहाड्य् ला । थुकिं थयं मथयं १.३ माउ (०.२ एकड) जग्गा त्यल च्वंगु दः सा ५९.८९ मिटर च्वः जः । थ्व सुड्ग वंशया काइ पाउया स्वंगुगु दाय्ये (सन ९७०) ख्य् दयकगु खः । लिपा दक्षिणी सुड्ग वंश व चिड्ग वंशया क्वाड्ग सुं नं ल्हवंगु खः । क्रान्तिलिपा थुकिता बांलाक भिक ल्हवंगु जुल । पिन्य् नं स्वयबलय् थुगु देगः १३ ता जः थें च्वंसां स्वन्हू न्ह्यपु जक दः गुलिं थुकिता न्ह्यता पोल्हें जक धाइगु । देगःया दुनय् च्वंगु चैत्यसं सन ११३२ व सन ११५९ या बौद्ध ग्रन्थया खाँत व बांलागु कलात्मक किपात च्वयो तःगु दः । थ्व देगः दयकगुया खास स्वंगू लक्ष्य दः न्हापांगु शेह, ली(शारीरा धायम्हा भगवान बुद्धया अस्थि) तयता नेगू पंगः (बाधा) पाखं चिड्क छ्वयता स्वंगुगु हः नयया चेताड खुसीया डुड्गातयता खुगू नियम अथे धाय् खुगु नियमया चिं थ्व देगः नियमः थथे दः-

क) हिंसा याय् मते ख) खःगु खाँ ल्ह ग) पाप मति तयमते
घ) लोभ याय् मते ड) भिं म्हायो जू च) धन खः थाय् छ्यः

थ्व देग तस्कं बांलागु थास्य् दाडः तःगु खः । थ्व येहलुड्ग पहाड्य् ला । थाना नं उत्तर दक्षिणया वाउंसे च्वंगु थाय् फुक्क खान्य् दः । थुकिया क्वय पाख्य् चेताड्ग खुसी न्ह्याडः च्वंगु दः । देगलय् दुनय् बिजुली मता तयो तःगु दः । गुकीया जः लं फुक्क सामानत यथे खान्य् दैगु नपां सुरक्षित नं जुइ । थुगु देगलं जिता ख्वपया डातापोल्हें देगः लुमांक बिला । थ्व देगः पेकिड्गया पाताचु देगः नपां ज्वः ला । देगलं चेताड्ग खुसीया च्वय रेल न्ह्याकिगु स्वयबलय् तस्कं हाय्येपुसे च्वं ।

षष्ठशील देगः स्वय धुकः जिपुं पश्चिमी भील (दह) व चेताड्ग खुसीया दथ्वीया ३०० मिटर च्वः जःगु हवाड्ग पहाड्य् वाडा । आनानं हाड्ग चाउ व पश्चिमी भील अलय् चेताड्ग खुसी बांलाक खान्य् दः ।

खप देता अझ ब्यबस्थित याय्गु कुतः याडः चवडा

खप नगरपालिकाय् जनप्रतिनिधिपुं नेदा फूत-

नेकगु कार्यकालया निति जिपुं निर्वाचित (त्याक) जुयो (बहाली) ज्या न्ह्याकागु आइतवार नेदा फूड स्वदा खय् पला छिडागु जुल । २०७९ साल जेठ ६ गते थौं खुनुया दिनय शपथग्रहण याडः पदभार कुबियागु खः । जिमिसं पार्टीं घोषणापत्र काथं जनताता बियागु बचंछगु छगु याडः पूर्वकः वया । ज्या याय्गु इवलय् जिमिगु ज्यायाता दुग्यंक स्वयो चिच्या-चिच्याहांगु कमजोरी व मचः मगायाता कुलः ल्हवनय्गु भिंकय्गु मौका बियो गवाहाली याडः द्यूपुं सचेत नागरिकपिन्ता दुनुगलनिसें सुभाय देछायो चवडा ।

थौं जिपुं तस्कं लयताया । नेपाल मजदुर किसान पार्टीया नायो भाजु नारायण मान बिजुक्छे (रोहित) जू खप अस्पतालया तिलगङ्गा आँखा अस्पतालया न्हँगु कार्यालयया उलेज्या आइतबार याडः दिल । थौं हे न्हँगु दय्कगु ख्ये बल म्हेतिगु कभर्ड हल नेपाल मजदुर किसान पार्टीया छ्याञ्जे नपां संघीयसांसद प्रेम सुवालं उलेज्या याडः दिल । अःभी स्वंगूगु ज्या इवःखय् चवडः चवडा । जनप्रतिनिधि पिनिगु स्वंगूगु दाँया लयताया सुखद पला खः ।

खप दे कला-संस्कृति ल्यंकः म्वाकः तःगु सुरक्षित नगर म्वाडः च्वंगु खप दे काथं म्हासिइका पिब्वयो च्वंगु दे खः । खप दे अझ ब्यबस्थित काथं छायेपियता जिपुं जनप्रतिनिधिपुं थाकु मचःसें हज्याड चवडा । उगु इवलय् जिमिसं अपलं पंगःत नं फयता नं तयार जुयो चवडा ।

नेपः या संविधान घोषणा जुगु च्यादा फूत । थुगुइलय संघ, प्रदेश व स्थानीय तहया नेकः नेकः निर्वाचन नं जुय धुंकल अथेनं अःतक देशय संघीयता बांलाक छ्यलय् मफः नि ।

नेपःया संविधान काथं संघ, प्रदेश व स्थानीय तहता थःथःगु अधिकार क्षेत्रय् दूनय चवडः ज्या याय्ता स्वायत्त खः । अथेनं संघ व प्रदेशं स्थानीय तहता थःगु क्वय्या एकाइ थें व्यवहार याय्गु धःसा त्वः मतनि । श्व संघीयता व नेपःया संविधानया भावनाया अखः खः ।

संघ व प्रदेश सभां कानून दयकिगु थाय् खः। अलय कानून दयकेगु स्वयो शासक दलत चिच्या-चिच्याहांगु नेगू प्यंगू लाखया विकास निर्माणय् ध्यान तयो च्वनि । डागू करोडतक स्थानीय तहं, डागू निसें नीडागू करोडतक प्रदेश सरकारं अलय व स्वयो तः हांगु योजनात दक संघ सरकारं स्वयगु कानूनी बन्दोबस्त याय् फःसा ज्याया दोहरोपन मजुसें राज्यया खर्च भार म्हवचा जुई ।



स्थानीय तहं संघ व प्रदेशं छ्वयो हैगु समानीकरण अनुदान अप्वय मःगु माग तयो च्वंगु इलय उकिया अखः सशर्त अनुदान अप्वतयो संघ व प्रदेशं स्थानीय तहता थगु लाहातय म्हीछिडः तय्गु स्वयो च्वना ।

जनसंख्या व क्षेत्रफलया लिधंसाय् स्थानीय तहता वित्त आयोगया सिफरिसं अनुदान बियगु संबैधानिक व्यवस्था दः । अथेनं चालु आ.व. २०८०/८१ या बजेटय् वागमती प्रदेश खप नगरपालिकाता समपूरक अनुदान व विशेष अनुदानया नामय् बजेट हे छ्वयो मह । बिस्कं बिचः तैपुं पालिकातयता गवाहाली मयाय्गु वागमती प्रदेश सरकारया नीति आपत्तिजनक खः । छुं नं सरकारता संविधानया अखः पक्षपात व महितां ज्या याय्गु छुट व सुविधा मरु ।

संसदय् विचाराधीन शिक्षा विधेयकय् जिल्ला शिक्षा कार्यालय हकनं म्वाकः हय्गु व्यवस्था याडः तःगु दः । स्थानीय तहता मा.वि. तहतकया शिक्षाया अधिकार संविधानं हे बियो तःगु इलय जिल्ला शिक्षा कार्यालय हकनं म्वाकः हय्तांगु प्रतिगामी पला खः ।

जिमिसं निर्वाचन घोषणापत्र व आ.व. २०८०/८१ या नीति व ज्या इवः या लिधांसाय् खप देया विकास निर्माणया ज्या हछ्याड चवडा ।

आय पाखय्

चालु आ.व. २०८०/८१ खय् आन्तरिक पाखय् ६० करोड व वाह्य स्रोत पाखय १ अर्ब ५३ करोड २३ लाख ४० हजार अलय वांगु दार्यया ल्यंगु मौज्जात १३ करोड ६२ लाख ५४ हजार याडः मुक्कं २ अर्थ २६ करोड ८५ लाख ९४ हजार स्रोत दै धाय्गु अनुमान यागुलि चालु आ.व. २०८०/८१ या हिमाखय् मुक्कं आन्तरिक आय ४० करोड ९३ लाख मुनय् फःगु उगु रकम चालु आ.व. या (लक्ष्यया) तातुनाया ६८ प्रतिशत खः । वांगु दार्यसं वहे ई याय्गु स्वयगु खःसा उगु धेबा ९ करोड ६४ लाख

सच्छिक्त स्वीप्यंगुगु स्वप पौ. ब.छि पौ(पाक्षिक)

अप्वः खानय् दः ।

श्व वांगु दार्ये स्वयो ३१ प्रतिशतं अपः जूगु दः । श्व करया घेरा तः चाक याडः यंकगुलिं जूगु खः ।

नेपःया सरकारं राजस्व इड विडगुलिं चालु आ.व. सं ५ करोड २० लाख वित्तीय समानीकरण, सशर्त, समपूरक व विशेष अनुदान याडः मुकं ४४ करोड ४० लाख, मालपोत रजिस्ट्रेशन पाखं १ करोड ५३ लाख वगु दःसा वागमती प्रदेश सरकारपाखं श्वहे आ.व.सं वित्तीय समानीकरण अनुदान व सशर्त अनुदान पाखय मुकं ३ करोड ६० लाख तका, सवारीकरया राजश्व बाँडफाँड पाखं २ करोड ३३ लाख तका वगु दः । थथे आन्तरिक व वाहय याडः मुकं २ अर्ब १३ करोड २३ लाख आय वैगु मति तःगुलि २०८१ वैशाख मसान्त तकखय मुकं १ अर्ब २३ करोड ७५ लाख वगुलिं मति तःगु आयया ५८ प्रतिशत जक आमदानी जुगु दः ।

राजस्व मुनयगुलिता प्रविधि मैत्री यायता थी थी सफ्टवेयर नपां अनलाइन भुक्तानी प्रणाली छ्यलः नागरिकपिन्ता अःपूक, कार्थछिक राजश्व भुक्तानी यायगु ज्या न्ह्याकः सेवा प्रवाह चतारं जूगु दः ।

ब्यय पाखय्

चालु खर्चपाखय् १ अर्ब ३६ करोड ९४ लाख ९४ हजार विनियोजित रकम मध्ये २०८१ वैशाख मसान्त तकखय् ८५ करोड १९ हजार खर्च जुयो विनियोजित रकमया ६२.०८ प्रतिशत, पूँजीगत खर्च पाखय् विनियोजित रकम ८० करोड ४१ लाखमध्ये २० करोड ४२ लाख ५३ हजार खर्च जुयो विनियोजित रकमया २५.३२ प्रतिशत प्रगति जूगु दः । वित्तीय व्यवस्था पाखय् ९ करोड ५० लाख विनियोजन जूगुलि श्वहे अवधिखय् २ करोड ३५ लाख खर्च जुयो विनियोजित रकमया २४.७३ प्रतिशत प्रगति जूगु दः । थुकाथं चालु पूँजीगत व वित्तीय व्यवस्थापन पाखय् मुकं छखय् लिडकगु २ अर्ब २६ करोड ८५ लाख ९४ हजार या ४७.४८ प्रतिशत वित्तीय प्रगति जूगु दः ।

शिक्षा

ख्वप नगरपालिकां दांकः भिंकः शिक्षा विद्यगु तातुडः चाय्कगु नेगू इञ्जिनियरिड कलेज नपां न्हय्गू शैक्षिक संस्थाय् अः देशां देछिया न्हयद्वस्वयो अपः ब्वनामिपुं ब्वडः च्वंगु दः । नगरपालिकां शिशु स्याहार केन्द्र निसं स्नातकोत्तर तर्गितक जनताया काय म्हायापिन्ता शिक्षा ब्यू ब्यू वयोच्वंगु दः । ख्वप विश्वविद्यालय चाय्केता जिमिसं मदिक्क कुतयाड वयागु दः। ख्वप विश्वविद्यालय विधेयक हज्याकयता प्रतिनिधिसभा शिक्षा, विज्ञान तथा प्रविधिसमितिया सभापति थाय् वाडः ध्यानाकर्षण पत्र बियागु जुल ।

ख्वप इञ्जिनियरिड कलेज व ख्वप कलेज अफ इञ्जिनियरिडया मंकः गवसालय २०८० असोज २४-२६ य 'कम्प्यूटर, इलेक्ट्रिकल, इलेक्ट्रोनिक्स व सञ्चारया लागिं प्रविधि विषयया न्हांगु अन्तरराष्ट्रिय सम्मेलन International conference on Technologies for computer, Electrical, Electronics and communication (ICT CELL-2023) व २०८० असोज ३० गते निसं कार्तिक २ तक खय् 'भूकम्प इञ्जिनियरिड विपद् पश्चातया पुनर्निर्माण योजना' नां या स्वकगु अन्तरराष्ट्रिय सम्मेलन Internation conference on Earthquake Engineering and Post Disaster Reconstruction Planning) अलय् २०८१ वैशाख १४ गते वास्तु शास्त्रया प्रवृत्ति व सम्पदा नां या स्वकगू राष्ट्रिय सम्मेलन (3rd National conference on Architectural Trends & Heritage) क्वचाय्का । थुगुसी ख्वप इञ्जिनियरिड कलेजेय ब्वडः च्वंपुं भूकम्प इञ्जिनियरिड या ब्वनामि ई. रोशन प्रजापति स्नातकोत्तर तर्गिखय् 'नेपाले प्रथम' जुलसा स्नातक तर्गिं सिभिल इञ्जिनियरिड ई.विकास पाण्डे 'सर्वोत्कृष्ट जुयता तः लात । अथेहे ख्वप कलेजेय ब्वंम्हा ब्वनामि पलिस्था रञ्जितकार नं अंग्रेजी विषय सं स्नातकोत्तर तर्गिखय् 'नेपाल प्रथम' जुयता तः लात ।

सामुदायिक ब्वनयकुथिया शैक्षिक गुणस्तर च्वजाय्केता विद्यालय अनुगमन व प्राविधिक पुचः दय्कःब्वनयकुथि स्वः वाननयगु व्यवस्था याडागु दः । थुगुसी ब्वनयकुथिया भौतिक निर्माण व थी थी नामय् १८ गू ब्वनयकुथि ५५ गू लाख तका दां अनुदान बिय धुन ।

चालु आ.व.सं नेगू सामुदायिक ब्वनयकुथिसं विज्ञान प्रयोगशाला दय्केता १३ लाख तका व ब्वनयकुथि साफूकुथि दय्केता व व्यवस्थापन यायता स्वंगू ब्वनय कुथिया लागिं १९ लाख ५० हजार तका आर्थिक अनुदान बिय धुन ।

थुगुसी इतिहास, भूगोल, राजनीतिशास्त्र, नेपाल भाषा नपांया विषय कायो ९ म्हासिनं ख्वप नगरपालिकाया छात्रवृत्ति खय् एमफिल्ड व पिएचडी याडः च्वंगु दःसा ख्वप कलेजेय राजनीतिशास्त्र कायो ब्वडः च्वंपुं ३८ म्हा व इतिहास संस्कृतिखय् १० म्हासिनं छात्रवृत्ति कायो ब्वडः च्वंगु दः । मेमेगु कलेजेय ब्वडः च्वंपुं तः म्हा सिता नं छात्रवृत्ति बियो च्वडागु दः ।

शिक्षाया गुणस्तर अजनं च्वजाय्केता शैक्षिक क्यालेण्डर दय्कः डागु, च्यागू व हिगू तर्गिया परीक्षा नं नगरपालिकां कायो वयागु दः ।

नगरया थीथी ब्वनयकुथि ब्वडः च्वंपुं मां ब्वा मरुपुं ५६ म्हा ब्वनामि पिन्ता शैक्षिक सामग्रीत इडः बिय धुन ।

थुगुसी १०१ म्हा ब्वनामिपिंगु शैक्षिक ऋण स्वीकृत

सच्छिव स्वीप्यंगु स्वप पौ. ब.छि पौ(पाक्षिक)

याडागु जुल व नपां याडः अःतकखय् ६०० म्हा ब्वनामिपिसं नगरपालिकां डागू लाखतकातक ऋण कायो उच्चशिक्षाः ब्वडः च्वंगु दः ।

स्वास्थ्यः

ख्वप नगरपालिकां १०० गू शैय्याया ख्वप अस्पताल, श्वासप्रश्वास पुनः स्थापना केन्द्र, जनस्वास्थ्य केन्द्र, सहरी स्वास्थ्य केन्द्र व आधारभूत स्वास्थ्य केन्द्र पाखं जनताता स्वास्थ्य सेवा वियो वयो च्वंगु दः । दाच्छिया ३६५ न्हँ ११ घौ ओपिडी सेवा वियगु ख्वप अस्पतालया विशेषता खः । वांगु दायँ ख्वप अस्पताल २ लाख २० हजार व प्यसम्हा स्वयो अपः विरामी पिन्ता सेवा ब्यगु खःसा चालु आःवःया वांगू हिल्ला दुनयँ ७० गू जिल्लाया १ लाख ९२ हजार ८२३ म्हा बिरामी पिन्ता सेवा बिय धुंकल । अः ख्वप अस्पतालय चिकित्सक, नर्स, व कर्मचारीपुं याडः मुक्कं १९४ म्हा जनशक्तिं ज्या साडः च्वंगु दः ।

चालू आ.व.या थुगु इलय आयुर्वेदिक स्वास्थ्य सेवा केन्द्र पाखं २ हजार १६४ म्हा सिनं स्वास्थ्य उपचार काय धुंकल । ख्वप तिलगङ्गा आँखा अस्पतालं चालु आ.व. या हिला दुनयँ २४,६०९ म्हा मिखाया बिरामी पिनिगु उपचार यातसा वहे इलय ६७७ गः मिखाया अपरेशनयाय धुंकल । अथेहे छँ छँ नर्सिडः ज्या इवः याय् पिसं २०,५२२ म्हा जनतानपां स्वापू तयो सामान्य स्वास्थ्य सेवा ब्यगु ल्या दः ।

थुगुसी हिला दुनयँ नगरबासी पिन्ता ८,७६२ गः सिलिन्डर अक्सिजन धेबा म्वायकः इडः बिलसा ७३१ म्हा नगरबासी पिन्ता धेबा म्वायक, हि ब्यगु जुल । हि वापतया धेबा ख्वप नगरपालिकां १५ लाख ४६ हजार स्वस व ख्वीडार्का पुलः बिल ।

अथेहे कडा ल्वय जूपुं २३१ म्हा सिता छम्हासिता हिंडाद्र ल्याखं ३४ लाख ६५ हजार तका ग्वाहाली याय् धुन ।

नगरपालिकां नगरवासीपिनिगु स्वास्थ्यता बिचः याडः मदिकक वडा वडाया मिसातयगु मचाछँ व दुरुप्वया क्यान्सर, वाँ जाँच व मिखा जाँच शिविर नपां श्वास प्रश्वास शिविरत न्ह्याक वया ।

ख्वपय् ८० प्रतिशत स्वयो अपः नगरबासीत स्वास्थ्य बीमाय् (आवद्ध) दुथ्याय् धुंकल । सकल नगरबासीपिन्ता स्वास्थ्य विमाखय दूतिनयगु जिमिगु कुतः जुयो च्वंगु दः । स्वास्थ्य बिमाया धेबा इलय हे म्ब्यगुलिं ख्वप अस्पतालता तस्कं थाक्यो च्वंगु दः । ख्वप अस्पतालं अःतिनि मानसिक ल्वय, व छाती ल्वयया विशेषज्ञ सेवा नं न्ह्याकागु जुल ।

सम्पदा ल्यंकः म्वाकः तयगु

२०७२ सालया तःभ्वखा ब्वय धुंकः ख्वप नगरपालिकां डन्च्यागू फल्चा, स्वीखुगः देगः, गुखा द्यो छँ, हिंस्वंगः पुखु, सत,

गुखा, द्यो छँ, च्याग तुंथि, च्यापु ल्वहँहिहि व मेमेगु याडः १५८ गू सम्पदात ल्हवनय-कानय व दानय धुंकगु दः सा अः हिंगूगु सम्पदात ल्हवनय-कानयया ज्या जुयो च्वंगु दः । २०८१ बैशाख २२ गते खुल्ला गुलाँबाजाया धिंधिंबल्ला क्वचाल ।

ऐतिहासिक व सांस्कृतिक महत्व कः घाडः च्वंगु च्यासदा पुलांगु भाजु पुखु ल्हवनय-कानय ज्या क्वचाय्कः २०८० फागुन २५ गते उगु पुखु उलेज्यायाडः सर्वसाधारण जनतानं चाहिलय दैगु व्यवस्था याडा ।

पुलांगु नगर लागाय् निजी छँ व सम्पदा ल्हवनय-कानय याय्ता चां काकः दानय्ता बः याडः च्वडा । लोकं ह्वागु थन्थु दरबार, ख्वप वडा नं ९ दतान्रयया पुजारी मथ, ६ वडाया छुमा गणेश द्योछँ नपां मेमेगु सम्पदात नं चां काकः दाडः वयो च्वडा । छुम, गणेशोया द्यो छँ क्वचाइ थें च्वनसा लक्ष्मी नरसिंह देगः, इखालाछी मथ, हाडाछँ नपांया सम्पदात नं दैगु दायँ क्वचाय्केगु काथं ज्या जुयो च्वंगु दः ।

पुरातात्विक महत्वया निजी छँ तः ल्यंकः म्वाकः तयगु नीतिकथं ख्वप नगरपालिका वडा नं ९ या छ्खा छँ, छँ थुवपाखं लिपा धेबा पुइकेगु याडः नगरपालिकां लाय छ्यलः ल्हवनय कानय याडः ब्यगु दः ।

सापारुया इलय पिब्वइगु थी थी विधात धिंधिं बला याडः ल्यज्या याडः सिरपा नं बियो वयागु दः । त्वालय-त्वालय ज्या साडः द्यूपु सांस्कृतिक गुरुपिन्ता हानयगु नीति काथं चालु वर्षय् २२ म्हा सांस्कृतिक गुरुपिन्ता हनय्य ज्या याय् धुंकल ।

२०८१ बैशाख २५ गते नेपाल मजदुर किसान पार्टीया नायो भाजु नारायणमान बिजुक्छँ(रोहित)जुया मू पाहाँलय् ख्वप नगरपालिकाया ग्वसालय अलय नेपाली इतिहास, संस्कृति व पुरातत्त्व, केन्द्रीय विभाग त्रिभुवन विश्वविद्यालयया मंकःग्वसालय ख्वपया कला संस्कृति, इतिहासया विषय छन्हूया कार्यशाला गोष्ठी क्वचाल ।

पर्यटन

चालू आ.व. या हिला दुनय गैर सार्क पाखंय् १,०७,१३१ म्हा सार्क व चिनियाँ पाखं १,०३,०२१ याडः मुक्कं २,१०,१५२ म्हा पर्यटकपिसं ख्वपय् चाह्यू भ्कायो स्वयोदिल । वांगु आ.व.या साउन निसँ वैशाखतकया हिला दुनय गैरसार्क पाखं ७८,९९३ म्हा व सार्क व चिनियाँ पाखं ६०, ३६९ म्हा याडः मुक्कं १,३९,३६२ म्हा पर्यटक पिसं जक ख्वप दे चाह्यू वगु खः । वांगु दाय्या स्वयो थुगुसी ७०,७९० म्हा (५०.८० प्रतिशत) अप्वगु दः ।

२०८० पुस १४ गते (पोखरी चिनौ सम्पदा जोगाऔं) पुखु म्हासिइकय्, सम्पदा ल्यंकः म्वाकः तय धाय्गु नारा ज्वडः साँस्कृतिक सम्पदा पदयात्रा व बहाबही म्हासिइके, सम्पदा ल्यंकः

सच्छिक्त स्वीप्यंगुगु स्वप पौ. ब.छि पौ(पाक्षिक)

म्वाकः तय धाय्गु नारा ज्वडः पुखु व वह बहीया पदयात्रा, योमारी महोत्सव व सांस्कृतिक सम्पदा पदयात्रा क्वचाल ।

विश्व पर्यटन दिवसया लसताय पर्यटन व्यवसायी, पर्यटक लॉजुव पुं, ट्राभल्स एजेन्सी, होटल व्यवसायी संघ, नेपाल पर्यटन बोर्ड व टुर्गान नपां पर्यटन विकासय ग्वाहाली यापुं थी थी संघ संस्थाता हानय ज्या याडा ।

२०५० साल निसे पर्यटन विकासय महत्वपूर्ण ज्या याडः ग्वाहाली याडः वगुलिं थुगुसी नेपाल पर्यटन बोर्ड निः स्वांगु नीडादा क्वंगु वह बुदिया लसताय ख्वप नगरपालिकाता हानय ज्या यात ।

पीडाकगु पर्यटक प्रहरी दिवसया लसताय ख्वप नगरपालिकाया पर्यटक सूचना व सेवा केन्द्रता उत्कृष्ट पर्यटक पथ प्रदर्शक व्यवस्थापन नपां पर्यटकपिन्ता व्यवस्थित याडः सूचना ब्यगुलिं हानय ज्या यात ।

२०८० फागुन २ गते चिनियाँ न्हँ दँ (ड्रयागन वर्ष) या लसताय ख्वपया लायकुलि व तः माही नेपाली व चिनियाँ विशेष सांस्कृतिक ब्वज्या नं जुल । अथेहे २०८० पुस २ गते हलिमली ब्वज्याया किपा ब्वज्या नं जुल ।

वातावरण व सचुकुचुः

नगरया लार्थे व गल्ली विद्युत व केबल तारत माकचा, जःथे उखय्ला थूखय्ला मदय्क प्यडः तःगुलिं स्वय हे घच्यापुक, दृश्य प्रदुषण जुयो च्वंगुलिं सहरया सुन्दरतां छायापियता तारत जमिन तलय ल्हाकय्गु ज्या जुयो च्वंगु दः ।

नगरया चुकः व थी थी थासय् वाउंसे च्वंक तय्गु नीतिं तःमाही, लायकुली, दतात्रय नपां साकोथा व थीथी थासय हज्याक यंकागु खः ।

नगरया मू लार्थे अपां व ल्वहतं सियगु ज्या क्वचाय धुंकगुलि अपलं झ्यातुगु लोड ज्वडः वैगु सवारी महय्केगु ज्या बुलहँ हज्याक यंकागु दः । खुसी सफायायता हनुमानघाट (खोँहे) व सल्लाघारी फोहर ना प्रशोधन केन्द्र दयक च्वंगु दः । खुसीया नेखय सिथय धः दय्के धुंगु दः ।

कृषि :

छँ नं प्याहाँ वइगु ध्वगिइगु व ध्वमगिइगु फोहरत विस्कं मुंकः नेपाली सः (कम्पोष्ट मल) दय्कः किसान तयता मियो वयो च्वंगु दः । ५ के.जि. आलु पुसा इडः ब्यू वलय २० केजी कम्पोष्ट सः धेबा म्वायकः बियो वगुलि थुगुसी क्वः छ्यगु मूखय वापुसा व कृषि चुन ५० प्रतिशत अनुदान नपां नगरपालिकापाखं पिकगु सः सहलियत मूलं इडः बियो वगु दः ।

किसानतय्सं ह्वय्कगु तरकारी अःपुक मियता ख्वप नगरपालिका वडा नं ५ या भेलुख्यलय तरकारी बजार दय्कः

च्वंगु दः । अथेहे कृषि उत्पादन स्वथानयता ख्वप नगरपालिका द लिवाली चिस्यान केन्द्र दय्केगु जुयो च्वंगु दः ।

किसानतय्गु लागिं बाली स्वास्थ्य उपचार शिविर नपां चा जाँचय याय्गु शिविरत न्यायकः च्वडा नगरपालिकां इडः बियो च्वंगु आलुबालीया अनुगमन, नगरबासी कृषक पिनिगु लागिं तरकारी नर्सरी व्यवस्थापन तालिम चाय्किग, व वा बुईजुइगु ल्वय व कीत ब्यवस्थापन सम्बन्धी अभिमुखीकरण ज्या इवः तःयाड वयो च्वडा ।

छारूवा त्वःत तःपुं प्यपांचु पशु तः यःथे त्व मतकयता मः काथं ब्यवस्था याडवयागुलि चालु आ.व. खय् १ हजार २९ म्हा खिचाता रेबिजया खोप बिलसा खिचाता बन्ध्याकरण याकेगु ज्या नं जुयो च्वंगु दः ।

त्वनय्गु नाः

त्वनय्गु नाः या समस्या ज्यंकयता न्हपानिसेया परम्परागत नाः छँ, पुखु, ल्वहँहि, तुंथि, ब्वडचा ल्यंकः तय्गु नपां नगरबासीपिनिगु छँ छँ तक मेलम्चीया नाः थ्यंकय्गु कुतः याडः च्वडा । के यु के एल नपां खौं मिलय् याडः थाय् थासय् बोरिड याडः नाः या ब्यवस्था याडः वया मेलम्चीया नाः पुलांगु पाइप हे इडः बियो च्वडा । नगरकोट वइगु नाः तस्कं म्हवँ जुयो वांगुलिं अजनं नगरया अपलं थासय् त्वनय्गु नाः या समस्या वगुलिं उकिता ज्यंकयता जिपुं जुयो च्वडा ।

कासाः

ख्वप नगरपालिकां भतिंगवारा, भलिबल, बक्सिड, जिम्नास्टिक, कराँटे व छ्यँ बल कासा मदिकक स्यडः वयो च्वंगु पूर्णकालीन कासा स्यनामित छ्वयो नगर दुनय्या ब्वनय्कुथि मदिकक कासा स्यडः वगु दः । थुगुसी ४९ म्हा ब्वनय्कुथिया कासा स्यनामिपिन्ता कासाया प्रशिक्षण बियागु जुल । २०८० माघ २१ निसें २७ गते क्वचः गु ब्वनय कुथि ब्यागु कासाया धिंधिं बल्ला हिंडांगु कासाय् ८१ गू ब्वनयकुथिं २२५६ म्हा ब्वनामिपिसं ब्वति कःगु खः ।

अथेहे २०८० फागुन २५ गते निसे चैत्र ३ गते तक थीथी हिंडांगु नगरपालिकाया पुचः तय्सं ब्वति कःगु अन्तरनगर महिला कबड्डी धिंधिं बल्ला नं क्वचाल ।

नगरबासीपुं स्वस्थ याडः तयता त्वालय-त्वालय शारीरिक व्यायाम प्रशिक्षण याडः वयागुली २०८० असोज २९ गते ख्वपया लायकुली बृहत शारीरिक व्यायाम (छिकोड) नं क्यन । अथेहे फुक्क नगरबासीपिनिगु स्वास्थ्य भिंकयता त्वालय-त्वालय खुल्ला व्यायामशाला चाय्क वगु खः । २०८०/८१ खय् थी थी राष्ट्रिय व अन्तरराष्ट्रिय कासाय् पदक त्याक वपुं कासामिपिनिगु मन च्वजाय्केता थुगुसी २०८० जेठ ५ गते नेपाल मजदुर किसान

पार्टीया नायोभाजु नारायणमान बिजुक्छें (रोहित) या मू पाहाँलय कासामिपुं हानयज्या जुल ।

ल्यासे ल्याम्हो व थःगु तुतिखय दानय फय्केगु:

स्थानीय ल्यासे ल्याम्होपिन्ता लाहातय ज्या दैगु सीप स्यडः थःगु तुतिखय दानय फय्केता विद्युत, कम्प्यूटर, प्लम्बिड, सुज्यासुयगु, साँच्याकयगु, बुटिक, ज्वरय यायगु (पाकशिक्षा) प्रशिक्षणत मदिकक न्ह्याकः वयो च्वंगु दः । थुगुसी अःतकखय थी थी विषयलय ३०६ म्हा सिं तालिम काय धुंकल ।

नगरपालिकां भाय् स्यनयगुनं मदिकक न्ह्याकसे जापानी भाय् व चिनियाँ भाय् स्यनयगु याडः च्वंगु दः । चालु बर्षय मुक्कं ११७ म्हा ब्वनामिपिसं प्यलाया जापानी भाय् व १३९ म्हा ब्वनामिपिसं चिनियाँ भाय् प्यलाया कोर्स पूवांकय धुंकल सा अः चिनिया व जापानी भाय् १२१ म्हा सिं सय्कः च्वंगु दः ।

ल्यासे ल्याम्होपिन्ता थःगु लाहातय ज्या दय्के बियता नगरपालिकां डागुलाख तका दाँ युवा उद्यमशीलता ऋण या व्यवस्था यागु दः । ख्वप नगर दुनय्या ल्यासे ल्याम्हो पिन्ता 'युवा उद्यमशीलता प्रवर्द्धन ऋण परिचालन याय्ता आवेदन मुनयगु ज्या न्ह्याय् धुंकल । २०८० चैत्र २७ गते निसें २०८१ बैशाख २ गतेतक लघु उद्यम विकास ज्या इवः दुनयसं नगर दुनयया हिगुंतुं वडाया ज्या मदयक च्वंगु ल्यासे ल्याम्होपिन्ता च्यान्ह्या उद्यम शीलता विकास तालिम क्वचाय धुंकल । उगु तालिमय ४६म्हा जुय फःपुं उद्यमीत ल्यय धंकगु नपां तालिमया प्रशिक्षार्थी (सयकामि) पिन्ता बेकरी, मखमली लकां, स्कूल ब्याग, सिँकःमि, पेपर रिसाइक्लिड, ख्वःपाः दय्केगु, स्यानिटरी प्याड दय्केगु थजगु तालिम बियगु तयारी जुयो च्वंगु दः ।

सहकारी :

सहकारी सञ्चालकपुं जनताया मुडः तःगु धेबा ज्वडः

सच्छित् स्वीप्यंगु स्वप पौ, बःछि पौ(पाक्षिक)

विसेवांपुं यक्व दयो वसेलिं नगरदुनय्या सहकारीखय अजगु समस्या थः मव दक इलय् ब्यलय सूचं वियगु, मुनय् ज्या याडः सचेत याडः च्वडा । समस्या वैगु थें च्वंगु सहकारी अनुगमन याडः ल्हवनयगु कुतः याडः वया । गुलिं सहकारीया सञ्चालकपिनिगु सम्पति रोक्का याडः जनताया बचत लिता बियगु कुतः याडः च्वडा ।

विकास निर्माणः

चालु आ.ब. या अः तक खय नगरस्तरीय योजना काथं सडक पूर्वाधार, लाँपिच, ग्राबेल, ब्लकंसियगु, ल्हव्हंतं सियगु व अपां सियगु ज्या याडः ८२ गू नगरस्तरीय व ल्हवनयगु ज्यात क्वचाय धुंकल । वडा बजेट वडा वडाया नं विकास निर्माण या ज्या जुयो च्वंगु दः । त्वनयगु नाः पाखय् तुमचो प्लानिड्ग व कमल विनायक प्लानिड्ग च्वनयगु नाः मुनयगु ट्याड्की दयकागु, ख्वप नगरपालिका १० बेखालय च्वंगु बेखाल कभर्ड हल व ख्वप नगरपालिका ६ नं वडाया आदर निकेतन भवन दानय धुंकल । खुसी बा लं याड्गु क्षति म्ह्वचा याय्ता ख्वप नगरपालिका ८ नं वडा लिबाली रिटेनिड्ग वाल दानय धुंकल । छसिकाथं योजना काथं भवन पाखय् बेखाल स्वास्थ्य सेवा केन्द्र भवन, शीत भण्डार गृह, खँचा पुखु स्वास्थ्य केन्द्र भवन दानयगु ज्या न्ह्याकः च्वंगु दः ।

नगरया थी थी थासय् ट्राफिक व्यवस्थापन मरुगुलिं समस्या जुयो च्वंगुलिं नगर प्रहरीया व्यवस्था याडः उकिया व बजार व्यवस्थापनयाय्ता फक्व कुतः याडागु दः ।

ख्वप नगरपालिका वडा नं ७, ८, ९ व १० वडाया थीथी थासय् थुगुसी ५९ गः सिसि क्यामरा तःगु दः ।

देको मिवा इतापाकय आवास योजना

ख्वप नगरपालिकापाखं चाय्क तःगु देको मिवा इतापाके



जग्गा एकीकरण आयोजना १६५३ पी जग्गाय न्ह्याक च्वंगु खः । मुक्कं किता ल्या २५०२ मध्येखय् अःतक ८६२ गू (३६.१७ प्रतिशत) पूर्जा इय् धुंगु दः । गुथि जग्गाया समस्या व जनताया गुनासाया खाँय दुयंक, गम्भीरजुयो छलफल याडः समस्या ज्यंकयगु कुतः जुयो च्वंगु दःसा पूर्वाधार दय्केगु ज्या नं जुयो च्वंगु दः ।

बजार अनुगमनः

उपभोक्ता हक अधिकारता सुनिश्चितता वियता नगरबासीपिनिगु स्वास्थ्य बाँमलागु लिचवः, लाकिगु फुक्क काथंया नसा (खाद्य) ज्वलं व उपभोग्य सामग्री त मिडगु ज्या भिंकः याकयता इलय् ब्यलय् ख्वप नगरपालिकां अनुगमन याडः च्वंगु दः । जनस्वास्थ्यनपां तप्यंकः स्वापू दैगु वास पसः, लापसः, चाकुमारी (मिठाइ) पस थजगु थी थी ब्यापार ब्यवसायलय मदिकक अनुगमन याडः च्वंगु दः । अनुगमनया इवलय लुयो वगु म्याद फुगु व ध्वगिगु वस्तुत धू याय्गु मापदण्ड पू मवांक व्यवसाय न्ह्याकः च्वंपिन्ता कानूनबमोजिम कार्वाही नं याडागु दः । अथेहे विकास निर्माणया ज्या खय् नं अनुगमन याडः च्वंगु दः ।

नक्सापासः

आर्थिक वर्ष २०८०/८१ या हिला दुनयँ मुक्कं ३१२ गू नक्सा दर्ता जुगुलि उगु ई दुनय २७२ गू नक्सा पास जुल । उलि मध्ये १५१ म्हा सिनं निर्माण सम्पन्न दसि पौ नं काय धुंकल ।

मुद्दा फछ्यौतः

आर्थिक वर्ष २०८०/८१ या हिला दुनयँ अनियमित निर्माण नपां या विषयया ४३० गू मुद्दा निपं (फछ्यौत) जुल । उगु इलय नगरपालिकाय् मुक्कं ३५१ गू मुद्दा दर्ता जूगु खः ।

साफू कुथि

जनज्योति साफुकुथि २०८० जेठ १ गतेनिसँ २०८१ बैशाख मसान्त तक १४ हजार ३४५ म्हा ब्वनामि(पाठक) पिसं साफुकुथिया सेवा व सुविधा काय धुंकल । नगरबासीपिनिगु मतिकार्थं ई-लाइब्रेरी न्ह्याकः च्वंगु दःसा ई-लाइब्रेरी कक्षसं १० गू इन्टरनेट नपां कम्प्यूटर व्यवस्था यागु दः । अःतक साफूकुथि १५३५ म्हा दुजःपुं दः । साफू कुथि दर्शन, धर्म, सामाजिक, भाषा, विज्ञान, कला, साहित्य, भूगोल व इतिहासया थयं मथयं हिंच्याद्वगु स्वयो अपः साफूत तयो तःगु दः ।

सञ्चार माध्यम

ख्वप नगरपालिकां आर्थिक अनुशासन व न्ह्यकनय स्वयर्थे च्वंक पारदर्शिताता हदाय तयो सुशासन कायम याय्गु कुतः याडः च्वंगु दः । उगु इवलय ख्वप नगरपालिकां न्हपांनिसँ हे थःगु ख्वः पौ पिथाडः नगरपालिकाया फुक्क ज्या इवः नपां निपं

सच्छिव स्वीप्यंगु ख्वप पौ, बच्छि पौ(पाक्षिक)

(निर्णय) त पिब्वयो वया । ख्वप नगरपालिकां मदिकक भक्तपुर लय् पौ व ख्वपपौ बच्छि पौ, भक्तपुर खबर डटकम (अनलाइन) पौ फेसबुक पेज, वेबसाइट पाखं नगरपालिकाया फुक्क ज्या इवः त पिब्वयो वयागु दः ।

थुगुसी 'वाकुपति चाड्गु नारायणमा तामाको छानामा सुनको जलप - २०८०', भजन गीत संग्रह, व 'भाजुपुखु पुनः निर्माण' याडः स्वंगू साफू पिथाडा ।

मेमेगु (विविध) :

२०८० मंसिर २६ गते जनवादी गणतन्त्र चीनया सचुवान प्रान्तया लसान सहर नपां मैत्रीपूर्ण सहकार्य पलिस्था जुल ।

२०८० मंसिर १७ गते ३२ कगू अन्तरराष्ट्रिय अपाङ्गता दिवसया लसताय ख्वप दे दुनयया अपाङ्गता जूपुं मनूतय्गु तः मुंज्या, स्वास्थ्य शिविर, थी थी कासा, किपा च्वज्याया धिधिं बल्ला व वास्केटबल कासा पिब्वत ।

नेकगू कार्यकालयया नेदाया दुनय ७५ गु स्वयो अपः स्थानीय तहया जनप्रतिनिधि व कर्मचारी पिनिगु पुचलं थुगु इलय ख्वप नगरपालिकाया अध्ययन अवलोकन भ्रमण यागु जुल । नपां संघीय व प्रदेश सरकारया नीगू स्वयो अपः पुचलं नगरपालिका भायो स्वयोदिल ।


थी थी देया उच्च पदस्य मनूतय्सं नं ख्वपया भ्रमण याडः द्युगु जुल ।

जेठ ३ व ४ गते वागमती प्रदेशया नीछगू गाउँपालिकाया प्रतिनिधिपिन्ता ख्वप नगरपालिकाया सम्पदा संरक्षण सम्बन्धी अभिभूखीकरण ज्या इवः जुलसा जेठ ८ व ९ गते मेगु २१ गु नगरपालिकाया जनप्रतिनिधि व कर्मचारी पिनिपुं प्रतिनिधिपुं वहे विषयलय अभिमुखिकरण जुड्गु ज्या इवः दः ।


थुकार्थं ख्वप नगरपालिका फुक्कसिया सय्केगु थाय् कार्थं हज्याडः च्वंगु दः । ख्वप देता थुगु थाय्तक ह्यता अपलं मनूतय्सं थःथःगु थासं ग्वाहाली यागु दः । वयकपुं सकलसिता दुनुगलं निसँ भिन्तुना देछाय् ।

जिमिसं जनताया अपलं आशा (अपेक्षा) या दथ्वी दःगु सिमित (म्हवचा) स्रोत व साधनया लिधंसाय् छुं छुं ज्या याडा । ख्वप दे व ख्वपया जनताया लागिं याय् मःगु अपलं ज्यात दः नि । व ज्यानं नगरबासीपुं नपां खँल्हाबल्हाँ याडः बुलुहुँ यायां वानय् । ख्वप देता ब्वस्यलागु नगर दय्केता नगरपालिकाया छगू छगू ज्याखय् न्ह्याब्लें पा लिडः ग्वाहाली याडः भूःपुं स्थानीय जनता राजनैतिक पार्टीया कार्यकर्तात, न्हपायाय्पुं जनप्रतिनिधिपुं नपां सकल सिता ख्वप नगरपालिकाया पाखं अपलं अपः सुभाय् देछायो च्वडा ।

लहवनय कानय्या बारवंः जनताया उवाहाली धस्वाडः च्वंगु खप दे



• सुनील प्रजापति
प्रमुख, भक्तपुर नगरपालिका



तस्विः सतिश पोखरेल



फाइल तस्विः



फाइल तस्विः

पुनर्निर्माणपछिको पाँचतले मन्दिर (माथि), भक्तपुर नपा- १ स्थित भाजुपोखरी र भक्तपुर नपा- ५ स्थित भैरवनाथ मन्दिर पुनर्निर्माणमा जुटेका स्थानीय ।

२०७२ सालया तः श्वखाचां तच्चकं बांमलाक लिचवः लाकगु हिप्यंगु जिल्ला मध्ये खप दे नं छगू खः । पुलांगु नगर पःतः थें हे जुय धुंकल । अपलं मनूतनं ज्यान त्वतय्माल । नाकावन्दी नपां थीथी हुनियाडः थ्यं मथ्यं नेदातक चतारं लहवनय्-

कानय् याय् मफूत । खपय् नेपाल मजदुर किसान पार्टीया प्रभाव पीदा स्वयो हॉं निसें लाडः वयो च्वंगु जुल ।

संघीयता छ्यलय्ता जूगु न्हापांगु स्थानीय तह निर्वाचन २०७४ य् खप नगरपालिकाय् सुनिल प्रजापतिया न्ह्यलुवाय्

नेमकिपाया फुक्क उम्मेदवारत त्याक वल । खप देशं विदेशीया छतिं हे ग्वाहाली मकःसैं जनतात तप्यंक हृदायवयो श्रमदानय् लहवनय् कानय् ज्याखय् ब्वस्यलागू ज्या जुल । अन्वषेण अधिकारी नपांया खँलाबल्हासं खप नगरपालिकाया प्रमुख सुनिल प्रजापति

जुं ल्हवनयकानय् स्वास्थय व शैक्षिक ह्युपाया अनुभव प्वंकः द्युगु जुल ।

स्थानीय तह निर्वाचनं त्याकः वानय धुडानीं जिमिसं गथे याडः मथां सम्पदा ल्हवनये कानय यायगु धायगु खाँ हचिड्डका । विदेशी दातापिसं ग्वाहाली यायगु प्रस्ताव हला । अलय् जिमिसं थःगु हे तुतिखय् दानय् फय्के मः धायगुलि बः बिया । निर्वाचन हाँ हे जर्मन सरकारं जर्मन विकास बैंक (के एफ डब्लू) पाखं ख्वप नगरपालिकाय् ल्हवनयकानयया लागिं थ्यं मथ्यं १ अर्व २० करोड तका (छगू करोड यूरो) बियगु सम्भौता नेपः या, सरकार, नपां यागु जुयो चवना ।

जिपुं चुनावं त्याक वयागु इलय व सम्भौता काथं छ्यलयता कुतः याड च्वंगु जुल । उकि थी थी सर्तत तयो तःगु जुयो चवना । न्ह्यागुसां कम्पनीता ल्हवनय कानयया ठेक्का बियमःगु मुद्दा मामिला जूसा अमिगु हे अदालतं स्वय मःगु अडिटर अमिसं हे छ्वयो हःम्हा तय्मःगु निर्देशक समिति नं अमिसं हे ल्ययो तैगु, प्रविधिक अमिसं हे ल्ययो तैगु निर्देशक बोर्डया सिफारिसय् हे सामान न्याय मःगु थजगु सर्तत दः । जिमिसं ठेक्कां ज्या सांकयगु बांला मतायका । भनीगु थःगु हे अदालत दः, महालेखापरीक्षकया कार्यालय दः । अजगु सर्त मानय् याय् फैमखु, ल्हवँजक धाया । नेपः या सरकार व जर्मनीया प्रतिनिधिपुं नपां तःक हे छलफल याडा । अलय जर्मनया संसद हे अनुदान सम्भौता स्वीकृत जुयो वगुलीं छुं छगू खाँवः, छध्वः हे हिलय् मफैगु लिसः वल ।

एक अर्व २० करोड तका ल्याहाँ वांसेली बयबयजुल । गुलिसिनं ख्वप दे दानय् हे मफय्क पःत, जुयो च्वनिगु जुल दकनं धाला । जिपुं ज्याखं क्यनयगु पक्षखय् हज्याडः चवडा । विदेशीया

अनुभवं नं सय्का थुडका । हाइटी सन २०१० सय् भवखा बवय धुकः अपलं आइएनजिओत व अन्तर्राष्ट्रिय दाता त द्रहँ वाना । अरबीं डलर ग्वाहाली वल । अथेनं ल्हवनय-कानय् ज्या मजु ।

चीनं सिचु आनय् २००८ य् बवःगु तः भवखाचां स्वदाया दुनय् हे ल्हवनय कानय् याय् धुकला । अजगु अनुभव जिमिगु लागिं गुरुमन्त्र थें जुल । मेगु वि.सं. १९९० या तः भवखाचा भनीगु हनयँ नजिर जुयो च्वंगु दः । उगु इलय् विदेशी तय्के ध्याछ धेबा हे मकःसिं नेपालं थमनं हे ल्हवनय-कानय् याता ।

स्वसदा स्वयो हाँ हे भी पुर्खा पिसं उलिमछि सम्पदात थःगु हे पौरखं दयकला । थःगु हे हिचःतिं धस्वाकला । उकीं यां थौं भीसं थव थःगु हे खः धायो गर्व यायगु थाय् द ता । विदेशी तय्के लाहाफयो सम्पदा ल्हवनय कानय यायबले कन्हेया पुस्तां गर्व यायगु थाय् गनां ल्यं दैला ? थजगु न्हयसः भनीगु हनय् दाँ वयो च्वंगु जुल । उकीं जिमिसं भीसं हे भीगु सम्पदा ल्हवनय-कानय यायगु खाँ क्वः छिडा अलय जनताता थवहे खाँ काडःग्वाका ।

नगरपालिकां चायकः तयागु नेगू कलेज ख्वप इञ्जिनियरिड कलेज व ख्वप कलेज अफ इञ्जिनियरिड्गं दायँ ४३२ म्हा इञ्जिनियरत बवलांकी । ल्हवनय-कानयगु ख्यलय् अमिगु योगदान महत्वपूर्ण जुइगु खानय् दत । स्थानीय ल्यासे ल्याम्हो पिन्ता नं सिँकः मि व डकःमिया तालिम बिया । श्रमदानया लागिं स्थानीय जनताकय् ग्वाहाली फवडा ।

जिमिसं छगू हे सम्पदा ल्हवनय कानय व दानयगु ज्याखय् ठेक्का मबिया । उपभोक्ता समिति दय्क आना यायपुं स्थानीय पिन्ता हे ल्हवनय-कानय् ज्या लःल्हाडा । थुकिया लागिं मःगु कानून

नगरसभां पारित याडा । संविधानं आठौं अनुसूचिखय् तयो तःगु २२ गू ऐनं दय्के फैं धःगु अधिकार छ्यलः नगरपालिकां अपलं ऐन, कानून व नियमावली दयकगु दः । शिक्षा ऐन, सहकारी ऐन, कासाया ऐन कला संस्कृति संरक्षण ऐन थजगु ६७ गू कानून नगरपालिकां दय्के धुकल । जिमिता ज्या सानयता गनां हे तःतः मत मक्यं । छु याय् । गय् याय् ? धाय् म्वः ।

स्थानीयता नपां तयो ज्या सानय मः धायगु खाँ खं जिपुं तामपा । न्हापांगु कार्यकालय् हे सच्छि व नीप्यंगु सम्पदात ल्हवनय कानय व दानय धुंका । अःतक खय् १५८ गू सम्पदात ल्हवनय-कानय व दानय धुंगु दः । १६गू ल्हवनय-कानय ज्या न्ह्याक च्वंगु दः । मथ, देगः, फल्चा, घोछें, धवाका, सत्तः, ल्वहँहिति थजगु सम्पदात ल्हवनय कानय व दानयगु ज्या जुयो च्वंगु दः । तुंथि, पुखु, ल्वहँहिति ल्हवनय कानय खय् नं स्थानीयपुं उलि हे तः ला ।

अथेयां निजी छँ नं तः भवखाचां अपलं स्यंकः ब्युगु दः अथेनं जनतां थःगु छँ स्वयो न्हापा सम्पदा ल्यंकः म्वाकः तयगु ज्या हृदाय तयो याडः क्यना । विदेशी ग्वाहाली व गुगुं ठेकेदार कम्पनीता ज्या याकसा थथे थःगु धायगु भावना दै मखु ।

ऐतिहासिक डातापोल्हँ ल्हवनयता पीन्यस स्वयो अपः सिनं श्रमदान याता । डातापोल्हँ ल्हवनयता ६५ लाख १३ हजार तका तुइगु अनुमान नारपालिकां यागु खः । थुकिया च्वयया तल्ला अपलं स्यडः दुय धुकगु अलय क्वयनं चिरिबायो ह्वदयो वगुलिं ल्हवनय मःगु खः । अलय नगरपालिकाया ३८ लाख ७८ हजार तका दां अथेधाय् अनुमान यागु स्वयो ५९.५२ प्रतिशत म्हवचा धेबां हे ल्हवनयगु ज्या क्वचाल । थुकिया लागिं १६/१७ लाख

सच्छिव स्वीप्यंगु स्वप पौ, बःछि पौ(पाक्षिक)

तका दां जनस्तरं आर्थिक ग्वाहाली नं जुल । जिन्सी नं उली हे ग्वाहाली याता । भी थमनं हे ल्हवनय-कानय याय धुन दक गर्व याय दत । इञ्जिनियरिड कलेजया प्राध्यापकपिसं हे इञ्जिनियरिड व आर्किटेक्ट डिजाइन याडः दयूगु खः ।

डातापोल्हें पोल्हें चियता मःगु पोल्हें अपा मनु तयसं थःथमं क्वल्हेंखय तयो कुबियो हयो आना थ्यंकः तय हयो ग्वाहाली याडः दिल । उगु पोल्हेंअपा पुलांगु छें पोल्हें चिडः तःगु छें दुडानि अः छ्यलय् थाय् मरुगु खः । श्रमदान याय् दक वपिन्ता पः बियता हे नगरपालिकाता तस्कं थाकुल । चा न्हयाइपुं, चाग्वरा तिनिपुं, अपा ल्हाईपुं ज्यामितयता म्हवचादक धेबा खर्च जुला । थुकाथं जनस्तरं ग्वाहाली मयागु जूसा ल्हवनय कानय याय् फौगु हे मखु । पोल्हें अपा न्हेंगु न्यायता समस्या जुयो च्वंगु । अः यां प्वल्हें अपा छिनं मछित । धेबा स्वयो जनता बल्ला धाय्गु खाँ ल्हवनय कानय्या इलय् क्यडः बिल । उकिं श्व ल्हवनय कानय्या अभियान न्हेंगु दय्केगुया पला नं खः ।

अलय संघीय सरकारं जिमिता गुगु ग्वाहाली दयमःगु खः व छतिं हे मरु । सिं जक सरकारी मू खय् ब्यूगु खःसा सम्पदा ल्हवनय-कानय तस्कं अःपुडुगु खः । थन्थु दरवार दानय्गु इवलय् अः छताया लागिं अःतक खय् नेगू करोडतकाया सिंजक न्याय धुन (मल्लकालया उगु दरवार वि.सं. १९९०या तःभवखाचा लिपा ल्हवनय कानय याबलय् भतिचा भीगु पह पागु जुयो च्वना । जिमिसं पुलांगु पहः ल्यंकः म्वाकः तय्गु काथं दानय्गु ज्या न्हयाकः च्वडा । थुकी सिं अपलं तय्मः । साँइयो दय्केता अपलं थिकय् । जिमिसं थःगु हे ज्यासः, थःपुं हे सिंकेमिपुं (कालिगढ) पाखं थजगु कलाकृति

दय्क च्वडा । सरकारी मूलं अपुक सिं काय् दःगु खःसा क्यू फिटं स्वदलं लाइगु अः टेण्डरय् थ्यं मथ्यं न्हय्दु पुलय् माल ।

लाय्कुलीया नृत्य वत्सला देगः दानयता जिमिसं १ करोड २८ लाख तका दां तुइगु इस्टिमेट याडागु खः । अलय् ५५ लाख हे ज्या क्वचाल । उकिनं खुगूलाख स्थानीय व विदेशी पर्यटकपिनिपाखं १-२ डलर चन्दा ब्यूगु खः । स्थानीयया श्रमदान व ग्वाहाली व नगरपालिकाया व्यवस्थापनं याड थ्यं मथ्यं बच्छी जक धेबा तुकः थुगु देगः या ज्या क्वचाल । ठेक्का व्यूसा १ करोड २८ लाख मचाल धायो धेबा ताडः कःवई ईलय हे ज्या नं सिधइ मखु । अलय उपभोक्ता समितिं म्हवचा धेबां इलय हे ज्या क्वचाय्कल । जनताया तागतया दसु खः श्व ।

९ वडाय् च्वंगु वाकुपति चांगुनारायण (थनय नारां द्यो) या देगलय् लूँ पोल्हें चिय्गु ज्याखय् नेगू करोड तुई धःगुलि यक्व हे म्हवचा धेबां ज्या सिधल । धेबा व सामान (नगद व जिन्सी लूँ, वह) याडः मुक्कं १ करोड ३८ लाख स्वयो अपः खर्च जूगुलि नगरपालिकाया २५ लाख जक खर्चजुला मेगु फुक्क चन्दा व ग्वाहाली ज्या क्वचाल । गुलिसिनं लूँ वह, नं दान बिल । इस्टिमेट याय्गु डिजाइन दय्केगु थजगु प्राविधिक ज्या नगरपालिकां यागु खः ।

हनुमानघाटय् भीगु थःगु पहः या कलात्मक धवाका दयकला । थ्यंमथ्यं ४५/४६ लाख स्वयो अपः खर्च जुल । इस्टिमेट, डिजाइन फुक्क नगरपालिकां याता । थाना फुक्क,ग्वाहाली स्थानीय पाखं हे ब्यूगु जुल । नगरपालिकाया ध्याछ धेबा हे मतु ।

जिमिसं पुननिर्माण क्वःछिडा बलय हे धायगु खः न्हःपां ज्या निं

न्हयाकी । मचगु फुक्क नगरपालिकां तै । स्थानीय थुकी थःगु भःपिला । छुँ दाँ हाँ तिति रानी- पुखु ल्हवनय्गु ज्या याडा । थानाया रानीपुखु यँया रानीपुखु पीदा स्वयो पुलांगु खः । अपलं सिनं मस्यूगु उगु पुखु नं गथे खः अथे हे दयकागु जुल ।

ऐतिहासिक भाजु पुखुः अजगु छगू ग्यसुलागू दसु खः । भक्तपुर क्याम्पस नपां स्वागु थुगु पुखु च्यास दा हाँ दयकगु खः । श्व जीर्ण जुय धुकगु खः । ०५४ सालय् निर्वाचित नगरपालिकाया जनप्रतिनिधिपिसं ०५८ सालय् हे थुगु पुखु ल्हवनय्गु कुतः यागु खः । अलय् कार्यकालया लिपापाखय जक ज्या न्हयाकय फता । ०५९ सालय् निसँ स्थानीय निकाय जनप्रतिनिधि बिहिन जुगुलिं थानाया ज्या अलपत्र जुल ।

लिपाया इलय थुगु पुखुली वर्षाया इलय बाहेक नाः हे मरु । स्थानीय सरकार दयधुक जिमिसं थूकिता ल्हवनय कानय याडः न्हपायाथें च्वंक दय्का । उपभोक्ता समितिपाखं ज्या याकय बलय् जन सहभागिता अप्वइगु, ज्याखय थःगु धाय्गु मति दैगु अलय म्हवचा धेबां योजना क्वचाइगु जिमिगु अनुभव खः । न्हयकनय स्वयथें पारदर्शिता व भिंक ज्या याय्गुलि गुब्ले लिपा मला ।

छुँ ई हाँ छगू जापानी संस्था श्वास प्रश्वास पुनस्थापना केन्द्र दय्केता ग्वाहाली याय्गु प्रस्ताव याता । जिमिसं धाया ससर्त जुयमः । ठेक्काय् ज्या याकय्गु मखु । न्हपांगु पलाय् १ करोड ७० लाख तका दां बिला । ठेक्का मवियगु खःसा सम्भौता जुगु च्याला लिपा भवन दानय् धुकः लःल्हायमः धायो दिल । जिमिसं धाया छिकपिनिम्हा प्राविधिक नं ब्वडः भ्नासं । स्वयो नं दिसँ । मभिंक दाडः गुणास्तरय् म्हवचा याय्गु खाँ हे जुइमखु । श्व जिमिगु छगू मौका नं खः

धाय।

उगु संस्थां च्यान्हू मपा डाक्टर इञ्जिनियर व स्वापु दःपुं पदाधिकारी अनुगमनय भ्नायो च्वनिगु। जिमिसं १ करोड ३६ लाख इलय् हे ज्या क्वचाय्का। ल्यं दःगु ३४ लाख जापानय् हे लिता छवया। मे मेथाय् धेबा मगा धाङ्गु, छिकपिसं यां फुक्क ज्या बांलाक इलय् हे क्वचाय्क नं उल्लै धेबा लिता बिला दक अजु चाला। जिमिगु बिशेषता हे थव हे खः।

थःगु हे पहःया निजी छँ

जिमिसं पुलांगु देया थःगु पहः मौलिकता ल्यंकः तयमः धाय्गु विचः खः। थुकी जिपुं सचेत जुयो च्वडा। वहे काथं नीति दय्का। छवप नगरपालिकाया थयं मथयं तीन वर्ग किलोमिटरति डाडः ख्यडः च्वंगु पुलांगु सहरय् फुक्क छँया पिनय्या मोहडा मौलिक शैली याय्गु हे खः। मोहोडाय तुगु अपा, प्वल्हँ अपा, सिँयालागिं नगरपालिकां ३५ प्रतिशततक अनुदानया व्यवस्था याडा। अनुदानया व्यवस्थां स्थानीयता मन च्वजाय्केता ज्या नं यागु दः। छँ नियम नं दः आल्मुनियम छ्यलय् मरु, अपां हे दानय् मःगु, सिँयाय्गु इयो तयमःगु अः छवपदे चाहय्सा छुं नं छँ पिनय् नं पिलर खानय् दै मखु पिलर सिस्टमया छँ खः अथेनं अपां ल्हाकय् वियागु दः। मखुसा टायल जूसां तयमः। थुकीं पर्यटन प्रवर्द्धनता घवासा जूगु दः। छवप दे पर्यटकीय नगर खः। पर्यटक पिन्ता मन क्वसायक सालयता थानाया मौलिकता ल्यंकः म्वाकः तय्मः। आधुनिक छँ स्वयता थाना सु स्वः वर्डै। सम्पदा ल्हवनय् कानय्या ज्या क्वचाईथें हे च्वन। मुद्दा मामिलाय् लाडच्वंगु छखा नेखा छँ बाहेक अपलं छँ नं दानय् धुंकल। थानाया कला

व संस्कृति ल्यंकः म्वाकः तय्ता नं ज्या जुयो च्वंगु दः। जुगी (कपाली) तय्सं पुङ्गु माहालीं बाजा ताडः हे वानिला धाय्थें च्वनय् धुंकगु खः। थव लिपाया डादा खुदा खय् ११/१२ म्हा सिनं माहालीं बाजा पुय सयकल।

तः भवखाचां थुडः ढय्गु ढवनय्कुथिया भवन नगरपालिका थमनं हे दयकल। भवन दाडः वियगु नपां शैक्षिक स्तर च्वजाय्केता नं कुतः याडः च्वडा। सामुदायिक व निजी स्कूलता मपाकसँ यांकय्गु कुतः याडः वया। शिक्षा बांलागु वियफः सा जक जनता सचेत जुइ धाय्गु जिमिगु मान्यता खः। डागु, च्यागु व हिंगु तगिंया परीक्षा स्वक याडः नगरस्तरीय परीक्षा काय्गु। शिक्षक पिन्ता नं तालिम बियो स्यल्लाक च्वडा। लिया वयकपुं न्ह्याथाय् हे वांसां छवपय नं सय्क वयागु धःसा जिमिता गर्व जुई। पुसा बांलासा बाली बांलाङ्गुलिं शिक्षकपिन्ता अपलं तालिम व प्रशिक्षण बियो वयो च्वडा। नगरपालिकां थमनं हे लाय छ्यलः नेगु इञ्जिनियरिड कलेज नपां उच्च शिक्षा ढवंकेगु न्ह्यगु शैक्षिक संस्था न्ह्याक च्वंगु दः। वडा वडाये शिशु स्याहार केन्द्र चायकः तयागु दः।

ढवनय्कुथि पाठ्यक्रम दय्कः नेवः संस्कृतिया खाँ नं ढवंकः वयो च्वडा। पुन्ही, सकिमा पुन्ही, गाठामगः, बिस्का जात्रा, मोहनी, स्वन्ति नपां थानाया संस्कृति, जात्रा व महोत्सवया खाँ नं ढवंकी। रञ्जनालिपि कोसंखय् हे तयागु दः। जिमिसं नागरिकपिनिगु स्वास्थ्य व शिक्षाता न्ह्याब्लें हृदाय तयो ज्या साडः वया। तः भवखाचां भक्तपुर अस्पतालता नं स्यंकः बिला। व प्रादेशिक अस्पताल खः। न्हँगु भवन दानय् धुंकल। नगरपालिकां छवप अस्पताल

चाय्क च्वंगु दः। थुगु अस्पतालय् वांगु आ.व. खय् ७० जिल्लाया २ लाख २० हजार स्वयो अपः सिनं स्वास्थ्य सेवा काय धुंकगु खः। लिपाया गुलाखय् १ लाख ७८ हजारं सेवा काय् धुंकल। नगरपालिकाय् २० म्हा स्वास्थ्य स्वयंसेविकापुं दः। नर्सया न्ह्यलुवाय् स्वयंसेविका पुचः छँ छँ थयंकः वाडः मचा बुःपुं थाकालिपुं जेष्ठ नागरिक, ल्वगिपिन्ता जाँचय् याई। वडा वडाय् डाक्टर नपांया स्वास्थ्य केन्द्रत दः। छगु नेगु वडाय् विशेषज्ञ डाक्टरनपांया सेवा दः। फुक्क नगरबासीपुं २० मिनेटया दुनय् स्वास्थ्य केन्द्रय थयंकय् फैः।

कोभिडया इलय जनस्वास्थ्य केन्द्रता हे कोभिड अस्पताल दय्का। यक्व जिल्लाया मन्तयसं थाना सेवा काला। जनस्तरया ग्वाहालीं निहं १२४ सिलिण्डर पिकाय फःगु अक्सिजन प्लान्ट तय फत। अः नगरबासीपिसं अक्सिजनया लागिं धेबा पुलय म्वँः। हिया लागिं रेडक्रस नपां सम्भौता याडा। नगरवासी पिन्ता हियाय्गु नं धेबा म्वँः।

जनताया विश्वास काय फःसा ग्वःतुम्हा नं दानय् फैसा जनतां विश्वास मयासा छुं नं परियोजना तःलाक क्वचायके मफैगु जुयो च्वना। स्थानीय तहता अः अपलं अधिकार बियो तःगु दः। थःकय् दःगु स्रोत साधनत छ्यलय् फय्के जक मः।

संघ व प्रदेश सरकारं बजेटय पक्षपात यागु जिमिगु मनय दः। थुगुसी बागमती प्रदेशं छवप देता वङ्गु बजेट प्वकेता, छतिं हे मरु। कानुनं दैगु समपुरक अनुदान, विशेष अनुदान नं मढ्यु। गुगु अनुदानयां देशां देछिया पनुक्क नगरपालिकाता बिहे बिङ्गु।

(स्रोत भन नयाँ पाखं भाय् हिला सं.)

२०८१/११/१५ गते शनिबार

नेपःया राजनैतिक अस्थिरता सुनं सुनं याड जुला ?

विवेक

संघीय संसद्या स्वकगू अधिवेशन बैशाख २८ गते निसैं जुल अथेनं बैठक न्ह्याकय धःसा मफूनि । गृहमन्त्री रवि लामिछाने सहकारी रकम ठगय याता धाय्गु द्रुपं बियो नेकां संसदीय छानबिन समिति निःस्वानय् मःगु माग तःतं संसद न्ह्याकय मबियो च्वंगु जुल । सांसद गगन थापां सहकारी ठगीयागु, संसदीय छानबिन समिति मदयकतलय् संसद न्ह्याकय मबियगु खाँ न्हिथाडः गृहमन्त्री लामिछानेता प्रधानमन्त्री, प्रहरी, महान्यायाधिवक्तां नपां पाखुयो तःगु द्रुपं बियो वगु दः । सरकारं जेठ १ गते नीति व ज्याइवः पिब्वयगु धःसा सदनता पाड तःसेलिं समस्या पिब्वगु दः ।

कोसी प्रदेशया मुख्यमन्त्री केदार कार्कीता लिकायो एमाले संसदीय समितिका नेता हिक्मत कार्कीता नियुक्ति याता । उकिया विरुद्ध सर्वोच्च अदालतय् तःगु रीत विचाराधिन तिनी । गण्डकी प्रदेशया मुख्यमन्त्री खगराज अधिकारी कःगु विश्वासया मतया विरुद्ध प्रमुख प्रतिपक्षी नेकां ब्यूगु रिट निवेदनय् सर्वोच्च अदालतं अल्पकालीन अन्तरिम आदेश ब्यूगु दः । सुदुर पश्चिम प्रदेशय् मुख्यमन्त्री दीर्घबहादुर सोडारी विश्वासया मत काय्ता सःतगु बैठकय् एमाले समर्थनय् मत बिड्गु मखांसेलिं बैठक अनिश्चित कालया लागिं दिक् यागु दः । कर्णालीया मुख्यमन्त्री राजकुमार शर्मा सच्चिन्डू खय् स्वकः तक विश्वासया मत काय धुंकगु दः । एमाले व माओवादी मदेश सरकारपाखं प्याहाँ वानय्गु इवः छुडः च्वंगु दः । वागमती व मेमेगु ल्यं दःगु प्रदेशया अवस्था नं थवस्वयो मपा । देशय् राजनीतिक अस्थिरता जुयो च्वंगुलिं थजगु ज्या इवःलं ग्वाहाली याडः च्वंगु दः । धात्थें सुनं

सुनं याडः देशय् थजगु अस्थिरता वला ? नेपःया राजनीतिक दलया नेतात गुलि कमजोर व पदय् प्यपुड च्वनय्ता लोभ याडः च्वनि उलि हे भारतीय शासक वर्ग फाइदा कायो च्वनि । नेपःया विषय पलापलाया अध्ययन याडः च्वंपुं भारतीय शासक पिसं नेपःया थाय्थासय् क्वत्यलय्गु याडः च्वंगु दः । बुल्लुगु नाखय् डालाय्गु भारतया नीति न्हूंगु मखु ।

नेपःया प्रधानमन्त्री पिनिगु भ्रमणनपां भारतया एजेन्ट तयसं मिलय याई । प्रतिनिधि सभाया नेकगू निर्वाचन लिपा राष्ट्रपति निर्वाचनया इलय् माओवादी व एमालेया दश्वी ल्वापु सुरु जुल । वहे इवलय् माओवादी फागुन १ गतेता जनयुद्ध दिवस क्वःछिडः विदा बियगु नं क्व छिता । उखुनुं हे भारतीय विदेश सचिव विजय मोहन क्वात्रा नेपालय् वला अलय प्रचण्डनपां मेमेपुं नेतय्ता नं नपालाता । एमाले नपांया गाथि नपां उलि सन्तुष्टि मजुगु भारत सरकारया दूत क्वात्रां प्रचण्डता भारत सरकारपाखं भ्रमणय् भांसँदक मधः । फागुन १० गते चिनियाँ राजदूत छन सन जुं वालुवाटारय् प्रचण्ड नपालाडः चीनया हेनान प्रान्तय् गवसः गवड्गु (१४ निसैं १७ चैत्र तक) बोआओ सम्मेलनय् ब्वना । अलय् प्रचण्डं थःगु न्हपांगु भ्रमण भारतं जुइ दक धाला । २०६५ सालय दकलय् न्हपां प्र.मं जूबलय प्रचण्डं चीनया कासाया ज्या इवखय् ब्यति कायो ल्याहाँ वगु इलय विमानस्थलं हे थःगु औपचारिक भ्रमण भारतं याय्गु खाँ काना ।

इतिहास पुडकः स्वय्गु खःसा नेपः या राजनीति ख्यलय भारतया लिचवः २००७ सालया दिल्ली सम्भौता निसैं अप्वयो वगु खः । उगु इलय जूजु त्रिभुवनया

स्वकीय सचिव गोविन्द नारायण भारतीय नागरिक खःसा उब्लेया भारतीय राजदूत चन्देश्वर प्रसाद नारायण नेपः या मन्त्रीमण्डलय नपां दुतिनी दैगु व मन्त्रीमण्डलया निर्णय मस्यौदानपां याय्गु यागु खाँ धायो तःगु दः व चिच्या चिच्या हांगु ज्या इवः खय् नपां ब्वति कायो भीगु देशय् दुनयया राजनीति लिचवः लाकः च्वनि ।अभ्क उब्लेया मन्त्रीमण्डलया नेकाया साधारण दुजः नपां मज्म्हा अलय जनआन्दोनय् नं गुब्लें ब्वति मकः म्हा भद्रकाली मिश्रता भारतया दबाबय् नेपःया मन्त्री मण्डलय् दुतिंगु इतिहासय् ब्वनय् दः । वया ससबौ विश्वनाथ मिश्र भारतया न्हपांम्हा राष्ट्रपति राजेन्द्र प्रसादया अनन्यमित्र जूगुलिं हे व सम्भव जूगु खः ।

नेपालय मन्त्रीमण्डलय् हिलय मःसा भारतीय एजेन्टत लिइमलाक जुइगु अलय नेतातय्गु भारत भ्रमण परम्परा थें जुय धुंकल । भारतया अनुमतिकायो जक राष्ट्रपति प्रधान मन्त्री,सरकार हिलिगु ज्याखं दे गये स्वतन्त्र व सार्वभौम जुय फै ? न्हपांगु संविधान सभा सभा मदय धुंकः सरकारया न्हयलुवा प्रधान न्यायाधिशं याय् मःगु ई नं वल । संविधान सभाया नेकगु निर्वाचनता दलतय् दश्वी विश्वासय सड्कट दःगु जुल । उगु इलय भारतया दूत नेपालय वला । अलय देशया राजनीतिया बारे छलफल याता । २०६९ साल माघ २५ गते प्रचण्डं थःगु पार्टीया हेटौडा महाधिवेशन उलेज्यासं 'सड्कट मोचनया अचुक अस्त्र' थःकय् दः धाला । छुं दिन लिपा प्रधान न्यायाधिश खिलराज रेमीया नायोसुई मन्त्रीपरिषद निः स्वाना । प्रचण्डया 'अचुक अस्त्र' भारतया इशारां चलय जूगु खः दक थुइके थाकु मजु ।

२०७२ साल असोज ३ गते नेपःया संविधान पिता ब्वयूता फुक्क धाय्थे ज्या सिधय धुंगुलि भारतीय दुतत वयो पानय्गु कुतः याता । उब्ब्लेया राजनीतिक दलतय्सं उक्तिता अस्वीकार याडः धः खुनुं हे संविधान जारी याता । उकिया लिच्चः असोज ६ गते निसं नेपःमि पिसं मति मतयाथे नाकाबन्दी फय माला । तः भ्वखाचां सास्ती फयो च्वंपुं नेपः मिपिन्ता ग्वाहाली याय्गु पली अभ्र सास्ती याय्गु अपराधी ज्या भारत सरकारं याता ।

२०४५ सालय नं व्यापार व पारवहन सन्धीया नवीकरण याय्गु इवल्य भारतीय पक्षं नेपःया भिं मजुइगु सर्तत हनय् तय् हःगुलि नेपः देशं अस्वीकार यासेलिं नाकाबन्दी याडः नेपःया विरुद्ध म्हुतुंमधःसिं युद्ध घोषणा याडः नेपःमिपिन्ता दुःख ब्यूगु इतिहास नं दः । २०४६ सालय पञ्चायत विरोधी आन्दोलन चर्कय् जूगु इलय् भारतं उब्ब्लेया पञ्चायत सरकारता साथ मब्यगुलिं पञ्चायती ब्यवस्था क्व दःगु धाय्गु पञ्चतय्गु दाबी खः । नेपालय सु सरकारय् च्वनी धाय्गु स्वयो नं भारतता भिं जुइगु सुनं ज्या याई धाय्गु खाँख्य जक भारत सरकारया सरोकार (मतलब) तःगु खानय् दः । भारतया समर्थनकायता भ्नीपुं शासक दलया नेतात चाकरी धितुधिडः वाडः च्वनिगु । च्यो तय्गु इज्जत दैमखु धाय्गु खाँ अमिसं मथु ।

भारतं नेपाली जनताता छुं भाति ग्वाहाली याथे च्वनि अलय उकिया ध्याछ ध्याछया ल्यातयो माँ व ब्याज नपां काकी । २०४६ साल लिपा निःस्वांगु साकार पाखं न्हःपां टनकपुर सम्भौता लिपा एकीकृत महाकाली सन्धी याडः महाकाली खुसीता नेपःया भारतया सीमा चिं याडः नेपः या महाकाली पारीया तः हांगु थाय् वं त्यलकाल ।

भारतं नेपःया स्वतन्त्र अस्तित्वया दे काथं काय् हे ममरु । श्व अःजकया

मखु नेहरूया शासन कालय् निसं थुगु मतिं मदिकक न्ह्याक च्वना । उगु इलय् भारतीय प्रधानमन्त्री जवाहरलाल नेहरूं भारतया संसदय हे नुवाता । च्वापुगुं (हिमालपर्वत) भारतया प्राकृतिक सिमाचिं जुयमः नपां नेपःया उत्तरय् तयो तःगु च्केपोष्टत भारतया उत्तरीसिमानय् च्वडः च्वंगु दः । भारतीय शासक वर्ग अःतक वहे मतिं व चिन्तनं ज्या याडः च्वंगु दः ।

नेपालय नं विदेशी स्वतन्त्रकाथं द्रहँ वगु भारतता ममरु । छुं छगू तहांगु परियोजना न्ह्याकय्ता वा नेपालं छुं नं देशनपां सन्धी सम्भौता याय माल धःसा भारतया अनुमति काय मः धाय्गु भारतीय शासकतय्गु मति खः । उकिया छगू ग्यसुलागु दसु एमसीसी सम्भौता खः । देशघाती एमसीसी सम्भौताया छ ध्वः नेपालय छुं नं न्हँगु योजना न्ह्याकय् हाँ भारतकय अनुमति कायमः दक च्वयो तगु दः । नेपःमि पिसं थुकिया चर्को विरोधयाता अथेनं शासक दल तय्सं 'व्याख्यात्मक टिप्पणी' या नामय संसदं पारित याता । व नेपःमिपिन्ता मिखालय धुलं छ्वकयगु ज्या जक खः । व भारत जुयो अमेरिकी सेना नेपालय दुकाय्गु लाँपु चायकेगु बाहेक मेगु छुं मखु । नेकाया नेता गगन थापां अमेरिकी सैन्य द्रहँ वःसा वाय्ता थानकोट पुडक पितिडः छ्व, सम्पति हरण यो दक संसदय नुवाता । सम्भौता संसदं अनुमोदन जुय धुकः अमेरिकी सैन्य प्रमुख पिसं नेपालय तः कहे भ्रमण याय् धुकल । माघ १५ र १६ गते राजनैतिक मामिला स्वाम्हा अमेरिकी उपविदेश मन्त्री भिक्टोरिया न्यूल्याण्ड, माघ २२ निसं २४ गते तक मन्त्री स्तरीय हैसियत तैम्हा युएससडया प्रशासक सुमाथा पावर, फागुन १ गते दक्षिण एशियाली मामिला स्वडम्हा ब्यूरोया उपसहायक विदेशमन्त्री आफ्रेन अतर २५ माघय् यूरोपियन युनियनया कमिस्नर जुहाले उर्मिलाइनेनं भ्रमण याता । थजगु भ्रमणं

जलाखाला दे चीनता पक्कानं न्हयलं चाय्क ब्यूगु दै । संरा अमेरिका भारतया बःकायो चीनता घेरेय याय्गु मति यम्हा खः । भारत नेपालय थःगु जक लिच्चः लाय मःगु मति याय्महा खः ।

अलय् नेपः या नेतातय्सं चीन व भारतया दशवी च्वंगु नेपालं नेम्हा जलाखाला नपां उतिं ग्यंक स्वापु तयो तय्फःसा जक नेपःदे सुरक्षित जुइ धाय्गु खाँ थुइके मः । मेमेगु हिलय फःसां जलाखाला हिलय फैमखु धाय्गु खाँ थुइकः नेपालं सार्वभौमिकता, स्वतन्त्रताय् घः मलाइगु काथं पला छियमः । फुक्कज्या मेपिसं याडः ब्यूसा ज्यु धाय्गु च्यो बुद्धि शासक दलया नेतात प्याहाँ वय फय्के मः ।

नेपालय राजनीतिक अस्थिरता जुयो च्वनिगु धाय्गु नेपःया सीमा चिं त्यल काकय्गु, राजनैतिक हस्तक्षेप व प्राकृतिक स्रोत साधन थःगु लाहातय् लाकय्ता भारतता अःपुक खापा चाय्क बियगु जुई । नेपःया खुसी भारतं लाक काल, सीमा चिं त्यल काल । व फुक्क नेपः कमजोर जुगु अवस्थाय हे यागु खं, खानय् दः । दलत छप्पा जबलय् संसदे हे चुच्चे नक्सा पारित याता । व नेपालया संविधानया अड्ग जूल । उकिं नेपालय राजनैतिक स्थिरता जुइगु भारतता मयो ।

संघ व प्रदेशया राजनैतिक अस्थिरता जुगु नेपःया शासक दलया नेतात न्ह्यागु काथं स्वसां अपुं निमित नायक (ब्वसामारी) जक खः । अस्थिरता याक लबः नइपुं व नेपः या नाहे मदय्क अस्तित्व हे न्हांकय्गु मतिं ज्या साडः च्वंपुं धात्थेपुं नायक (मू पात्र त) भारतीय एकाधिकार पुँजी व आनाया शासकवर्गत खः । उकिं नेपः मिपुं छप्पा छधि जुयो भारतीय एकाधिकार पुँजी व भारतीय शासक वर्गता मुख्य दुश्मनकाथं म्हासिडकय् मफूतलय् नेपःया सार्वभौमिकता व स्वतन्त्रताया रक्षा नपां नेपःया विकास याय् फैमखु ।



कुंमि धुर्का: थ हे मुस्या जुया खँव: खँव या दथुया प्वक्तां ह्वतय्

पूर्ण वैद्य

'जि खँव: बिइ
छं उकिइ थ:गु घा: जायेकि !!

गनं च्वं खँव वा गात

जि वाथाक्क दना

खँव: सिना कया:

जल-तरंगया ख्वलाचा थें

गुकिइ थ:गु घा: लुना जिं

स्या:यात खँवलय्

थाना काये धका:

तर,

जिगु घा: ला जाइ गनं !

अलगसा तारा आमा

आपालं खँव: ला

गपाय्च्च ज्व: खनि

जिगु अर्थ !

अनुभूति नायेका

उकिइ हानं

न्हू-अर्थया लिसं तया: जिं

न्हू-संस्कार स्वायेत

अर्थया सर्गतय्

जिगु स्या:चा:

गुगु हिइ ख:

वयात हे

सकसियां सलय् लिश्वयेक

थाना काये धका:

नाखिनं थें -

खँवलय् भ्वलुना थ:

गुलि जाया

गुलि श्वया

अन जि !

व सिबे गुलिखे उप्व: ला

खँव: खँव: दथुया प्वक्तां ह्वतं ज्वया

अव्यक्त फुना खनि जि, आपालं

सुम्क / सुम्क - अथें / अथें

घालं बा: व:गु हि थें -

खला,

घा:या छुं स: मदुगु

छफुति हिइ नं

अल्याख खँव:या पु ख:

उल: मुल: स: श्वइगु

तत: रव:गु ल्वहं हे चर्कय् जुइक बा: न्ह्या: वइगु

घा:या व हे मौनतां पुना

हियूम्ह जित:

हानं - हानं, खँवलय् बुइकिइ

हानं - हानं, घा:या हिइ जुया:

नाय्खिनय् श्वयेकी

श्व शहर बस्तीया छ्वास - दुवा: पतिकं !

थन सुया गुलि

थ:गु बांया ब्या दु

थ:गु म्हया जा: दु

व दक्वं सर्ग:या है कन्ना खनि !

वं त्व:ता प्वना ब्युगु !

(तिब: ११००)

स्वप नगरपालिकाया ज्या भवः त

ब्वनय् कुथि हज्यासा दे हज्याई

बैशाख २७ गते

स्वप नगरपालिकाया प्रमुख सुनिल प्रजापति जुं समाजता बुद्धिजीवीकरण याडः सभ्य व सुसंस्कृत समाज दयकेता स्वप नगरपालिकां गरिब ब्वनामिपिन्ता शैक्षिक ऋण व छात्रवृत्ति बियो उच्चशिक्षा वियगु नीतिकथं हज्याडः च्वंगु खाँ स्वप नगरपालिकाया ग्वसालय जूगु सामुदायिक ब्वनयकुथिया प्रधानाध्यापक व प्रिन्सिपलत मुंकयगु ज्या इवःसं धायोदिसे नगर दुनय्या ब्वनयकुथित नगरपालिकाया नीति काथं हज्याय् मःगु अलय कमजोर ब्वनयकुथिया शैक्षिक स्तर च्वजायकेता अपलं मेहनत याडः हज्याय् मःधायोदिल ।

वयकलं ब्वनयकुथिया प्रतिनिधिपुं मुंकः स्वप नगरपालिकां शैक्षिक भित्ते पात्रो दयकः पिथानय् धुंगुलिं वहेकाथं शैक्षिक व ज्या इवःत हज्याकयूता धायो दिसे पिनय् जिल्लां ब्वक- ब्वे वपुं शिक्षक व ब्वनामिपिन्ता स्वपया बांलागु लिचवः लाकयगु भूगु मंकः कर्तव्य खः ब्वनयकुथि हज्यासा दकः दे हज्याई धायो दिल ।

वडा नं ९ या वडाध्यक्ष रबिन्द्र ज्याख्वं स्वपया ब्वनयकुथित न्याकयगु थःगु हे इतिहास दःगु खाँ व्याकसे शिक्षक पिसं जागिर नयगु जक मखुसं मचातयगु भविष्य दयकेगु मतिं



ज्या सानय् मः धायोदिल ।

नगर शिक्षा शाखा भक्तपुर शाखा अधिकृत साधुराम फुयालं शाखाया वार्षिक योजना काडः दिलसा संयुक्त परीक्षा समितिया कजि रोशन राज तुडुतुडु व आधारभूत विद्यालय समितिया नायो दीपक माकं नगर शिक्षा ऐन, शैक्षिक पात्रो, बिदा कटौती, पाठ योजना, मूल्याङ्कन प्रणाली, शिक्षक सरुवा, स्थानीय पाठ्यक्रम थी थी खाँत न्हयसः त तयो द्यगु खः ।

स्वास्थ्य कःमिपिसं मन ह्वयकः बिरामीया सेवा याय् मः

बैशाख ३० गते

स्वप नगरपालिकाया प्रमुख सुनिल प्रजापति जुं नर्सिड पेशा च्वछाय वहुजुगु पेशा खः धायोदिसे इमानदार जुयो सेवा याः सा थःगु पेशाप्रति गर्व याय् फैं धायो दिल । अन्तर्राष्ट्रिय नर्सिड दिवसया लसताय आइतवार स्वप नगरपालिका पाखं चायकः तःगु स्वप अस्पतालया ग्वसालय जूगु मुंज्यासं सम्बोधन यासे प्रमुख प्रजापति जुं पुँजीवादी व्यवस्थाय् स्वास्थ्य उपचार सेवाता व्यवसाय याडः थंकेसेलिं गरिव जनतात उपचार याय् मफयो वांगु खाँ व्याकसे स्वप अस्पताल जनताया अस्पताल काथं अःपूक सेवा व्यूय् वयो च्वंगु खाँ व्याक दिल । नपां समाजवादी देश क्यूबाया स्वास्थ्य उपचार सेवा हलिमय दकलय च्वजःगु ल्या पिब्वसे सन २०१५ खय् ३७,००० क्यूबाली डाक्टरत हलिमय्या ७७ गु देशय् विपत्ति व महामारी लाडः च्वंपुं जनतात उपचार सेवाय् जूगु खाँ व्याकः दिल ।

नगर प्रमुख प्रजापति जुं महामारी थजगु सडकटया इलय निजी अस्पतालत बिरामीया उपचार यायूता लिच्युगु, सरकारी अस्पताल हे जक बिरामी तयगु उपचार केन्द्र जूगु खाँ कुल, दिसे स्वप नगरपालिकां म्हवचा धेबां दक्ष जनशक्ति ब्वलांकयगु तातुडः स्वप मेडिकल कलेज व स्वप विश्वविद्यालय चायके ताडागु अलय सरकारं विश्व विद्यालय विधेयक पारित मयागु खाँ काडः दिल ।

वयकलं नर्सिड दिवसया लसता प्वकसे उच्च मनोबल ज्वडः बिरामीया सेवा यायूता मार्ग निर्देश याडः दिल ।

ज्या इवःसं वडा नं ९ या वडाध्यक्ष रबिन्द्र ज्याख्व जुं डा.नर्मन बेथुन, डा. कोटनिस व फ्लोरेन्स नाइटिड्गेल थजपुं चिकित्साकःमि पिसं विदेशी भूमि ल्वाडःच्वंपुं न्यायप्रेमी जनताया उपचार सेवाय चाँन्हिं लगय् जुगु इतिहास काडः दिसे न्यायया

सच्छिव स्वीपिंग्गु स्वप पौ, बःखि पौ(पाक्षिक)

पालिड संघर्ष याडः चवंपुं जनताया उपचारय् जुयता अन्तर्राष्ट्रिय भावनां ग्वाय्मः धायोदिल ।

ख्वप अस्पतालया निमित्त मेडिकल डाइरेक्टर डा. मजेश प्रताप मल्लं गरिब विरामीया उपचार सेवा यायां अमिसं विड्गु सुवलं आत्मगौरव दैगु खाँ काडः दिल । अथेहे इन्टरनल मेडिसिन विशेषज्ञ डा. अमर प्रजापति जुं न्हँगु पुस्तां नर्सिडः पेशा यःक जुगु बांलागु खाँ खः धायोदिसे पूँजीवादी व्यवसाय् नर्सिपिन्ता ज्या अनुसारया ज्याला मब्यगु खाँ काडः दिल ।

ख्वप बहुप्राविधिक अध्ययन संस्थान नर्सिडः विभाग या प्रमुख ईश्वरी डंगोलं नर्सपुं अस्पतालय् जक लिक्डः मच्चवंसें समाजनपां भेलयपुडः मफूपुं बुहा बुहीपुं अपाङ्ग व असहाय (हाना मरूपुं) पिनिगु सेवाय जुयमः धायोदिल ।

ज्या इवः सं ख्वप अस्पताल अन्तरङ्ग विभागया नर्स



रबिना कवां व जिन्सी प्रमुख विनोद देनेखुं अन्तर्राष्ट्रिय नर्सिडः दिवसया इतिहास व सान्दर्भिकता काडः दिल ।

थ्वहे इवल्य नगर प्रमुख प्रजापति जुं ख्वप अस्पतालया ज्या साडः चवंपुं नर्सिपिन्ता ब्याच लः ल्हाडः हानय्ज्या याडः दिल ।

अरनिको राजमार्गय् आदर्श चोकया विषय छलफल

बैशाख ३१ गते



ख्वप नगरपालिकाया प्रमुख सुनिल प्रजापतिया नायोसुई सूर्यविनायक-धुलिखेल, धुलिखेल- सिन्धुली-बर्दिबास सडक आयोजनासं अरनिको राजमार्गय् लागू आदर्श चोक कायम याय्गु खायँ ख्वप नगरपालिकाया जनप्रतिनिधिपुं, आयोजनाया प्रमुख पुं नपां प्राविधिक पुं व स्थानीय सरोकार वाला त नपां सोमबार छलफल जुल ।

वहे इवल्य आदर्श चोक निर्माणया सम्भाव्यता अध्ययन याय्ता ख्वप नगरपालिका वडा नं ५ या वडाध्यक्ष योगेन्द्रमान बिजुक्छैया कजिलय गुम्हासिया ज्यासना पुचः (कार्यदल) दयकेगु खाँ क्वः छ्यसे उगु ज्या सना पुचःता थौया दिल्यां १५ न्हू या दुनय आदर्श चोक व (निर्माणया संभाव्यता) गथे याय् फै धाय्गु

अध्ययन प्रतिवेदन ख्वप नगरपालिकाया प्रमुखता पेश याय्गु खाँ क्वः छिता ।

ज्या सना पुचलय वडा नं ५ या वडाध्यक्ष योगेन्द्रमान बिजुक्छैया कजिलय ७ वडा वडाध्यक्ष उकेश कवां, ८ वडाया वडाध्यक्ष कृष्ण प्रसाद कोजु, ख्वप नगरपालिकाया योजना प्रमुख दिलभक्त जयना, आयोजनाया सिनियर डिभिजन ईञ्जिनियर नारायण प्रसाद लामिछाने, ईञ्जिनियर विवेक पाण्डे, स्थानीय स्वापु दःम्हा कुमार चवाल, मणिरत्न बज्राचार्य, ख्वप नगरपालिकाया इञ्जिनियर सुशिल बासी दःगु खः ।

लाँ तः ब्याकय्गु इवल्य स्थानीय जनतात डायो, वाला फ्वाला जुयला पंगः जुय फःगुलिं स्थानीय जनतां आदर्शय प्वद्वकां लाक हे तयो तय्गु माग याड वयो च्वंगु खः । न्हिं द्रलंद् ब्वनामिपुं स्थानीय जनतात इरुथुरू जुयमः उगु लाँपुति तःतः जायक पःख दाडः जनताता अपलं दुःख कष्ट जुइगुलिं उकियापलिसा बांलागु मेगु लाँपु बियमःगु मागः यायां ज्या पाडः वयो च्वंगु खः ।

छुँ दिन हाँ स्थानीय जनताया छगू प्रतिनिधि मण्डलं नगर प्रमुख प्रजापतिता नपालाडः समस्या ज्यंकय्ता ध्यानाकर्षण यागु खः ।

**ख्वप नगरपालिकाता न्ह्याबले सफा,
सुगधर तय्गु सकल नगरवासीतय्गु कर्तव्य खः ।**

विश्व विद्यालय प्राज्ञिक छलफल जुयमः

जेठ २ गते

खप नगरपालिकाया गवसालय नपां त्रिभुवन विश्वविद्यालय नेपाली इतिहास संस्कृति व कला केन्द्रीय विभागया मंक गवसालय वांगु बैशाख २५ गते क्वचःगु खपया कला, संस्कृति व पर्यटन विषयसं जुगु अन्तरक्रिया ज्या इवः या बुद्धवार



लिफस्वयगु (समीक्षा) ज्या इवः क्वचाल ।

ज्या इवः सं खप नगरपालिकाया प्रमुख सुनिल प्रजापति जुं नेपःया ल्यासे ल्याम्होपिन्ता थःगु देशय हे अध्ययन, अनुसन्धान व लाहातय ज्या बिय गुलि सरकारया ध्यान मवांगुलिं ल्यासे ल्याम्होपुं विदेशय वाडः च्वंगु खाँ काडः दिल ।

भूगोल, इतिहास, कला, संस्कृति, राजनीति शास्त्र थजगु मदयक मगागु विषय खय उच्च शिक्षा ब्वनिपुं ब्वनामिपुं म्हवचा जुयो वांगुलि चिन्ता प्वकसे वयकलं विश्वविद्यालयसं अध्ययन अनुसन्धान व प्राज्ञिक छलफल याडः नीति निर्माणय ग्वाहाली यायमःगुलि बः बियो दिल ।

प्रमुख प्रजापति जुं खपया मूर्त व अमूर्त सम्पदात हलिमया सम्पत्ति खः धायोदिसे नगरपालिकां कला, संस्कृति व सम्पदा ल्हवनय कानय व न्हूगु पुस्ताता सीप लः ल्हाड वियता ग्वाकः च्वडागु खाँ काडः दिल ।

वयकलं ब्वनयकुथिया तगिलय स्थानीय पाठ्यक्रमपाखं न्हूगु पुस्ताता खपया इतिहास, संस्कृति विषय ब्वंकः वयो च्वंगु नपां थजगु उच्च तह लय ब्वडः च्वंपुं ब्वनामिपिन्ता नगरपालिकां छात्रवृति व शैक्षिक ऋण ब्यु ब्युं वयो च्वंगु खाँ काडः दिल ।

त्रि.वि. नेपाली इतिहास, संस्कृति व कला केन्द्रीय विभागया विभागीय प्रमुख प्रा.डा. सोमप्रसाद खतिवडा जुं विश्व विद्यालयता समुदाय तक थयंकयगु अभियानपाखं नगरपालिका नपां मंकः गवसः गवयो अध्ययन अनुसन्धान याक वयागु खाँ ब्याकसे म्हवचा इलय हे व्यवस्थित ज्या इवः याडः उच्च तहया व्यक्तित्वपुं मुंकः अपलं सहभागिता नपां ज्या इवः न्ह्याकगुलिं नगरपालिकाता सुभाय देछायो दिल ।

वयकलं विश्वविद्यालयसं खपया कला, संस्कृति नपां पर्यटन उद्योगया खाँय पाठ्यक्रम च्वयोतःगु खाँ ब्याकसे थानाया सांस्कृतिक पक्षता हलिमय ब्याकयगु ज्याखय विश्वविद्यालय व नगरपालिकाया मंकः कुतः जुयमः धायो दिल ।

ज्या इवःसं खपया कला, संस्कृति व पर्यटनया विषय जुगु अन्तरक्रिया ज्या इवःया प्रतिवेदन त्रि.वि. पाखं नगरपालिकाता लः ल्हागु जुल ।

पुरातात्विक सम्पदा व्यवस्थापनया अभिमुखीकरण

जेठ ३ गते

खप नगरपालिकाया प्रमुख सुनिल प्रजापति जुं प्रदेश सुशासन केन्द्र, बागमती गवसालय जुगु स्थानीय तहया पुरातात्विक सम्पदा, संस्कृति व पर्यटन स्वइपुं पदाधिकारी व पुरातात्विक सम्पदा व पर्यटन शाखाय ज्या साडः च्वंपुं कर्मचारी पिन्ता पुरातात्विक सम्पदा व्यवस्थापन सम्बन्धी अभिमुखीकरणया ब्यानर ब्वडः ज्या इवः उलेज्या याडः दिल ।

प्रमुख प्रजापति जुं ऐतिहासिक अलय सांस्कृतिक नगर खपय २१ गू स्थानीय तहया जनप्रतिनिधि व कर्मचारी पिन्ता लसकुस यासे ३०दा हाँ शिक्षा व स्वास्थ्यया लागाय लिया लाडः च्वंगु खप देता देया ब्वस्यलागु नमुना स्थानीय तह दयकेता जनप्रतिनिधिपुं व कर्मचारीत हज्याडः च्वंगु खाँ काडः दिल । वयकलं खप देता ज्ञानविज्ञानया मू थाय काथं दयकेगु तातुडः नगरपालिकां ६०० म्हा ब्वनामिपिन्ता डागुलाख तका



तकया शैक्षिक ऋण बियो वयो च्वंगु इतिहास, भूगोल, नेपालभाषा, राजनीतिशास्त्र व अर्थशास्त्र ब्वनिपुं ब्वनामिपिन्ता

सच्छिक्त स्वीप्यंगुगु स्वप पौ, ब.छि पौ(पाक्षिक)

स्नातक तगिं व व स्वयो च्वयया तह ब्वनिपिन्ता पूर्ण छात्रवृत्ति ब्यू ब्यू वयो, च्वंगु नगरपालिकापाखं न्हयगु शैक्षिक संस्थात चाय्कः देशादेछिया न्हयद्वस्वयो अपः ब्वनामिपिन्ता ब्वकः वयो च्वंगु खाँ काडः दिल ।

वयकल ख्वप नगरपालिकां सच्छिक्त शय्याया ख्वप अस्पताल चाय्क सेवा बियो वयागु खाँ ब्याकसे ख्वप अस्पतालं वांगु आ.व. सं ७५गु जिल्लाया १ लाख २५ हजार म्हा स्वयो अपः बिरामीपिसं सेवा काय धुंगु अलय चालु आ.ब. या हिला दुनयँ १ लाख ८० हजार म्हा स्वयो अपः बिरामीपिसं सेवा काय धुंगु खाँ काडः दिल । वयकलं ख्वप नगरदुनयया नगरबासीपिसं २० मिनेटया दूरीखय् स्वास्थ्यसेवा बियोवयो च्वंगु अलय अः देशया छगू यां छगू जक छातीपुनस्थापना केन्द्र नपां ख्वप तिलगड्गा आँखा अस्पतालपाखं सेवा बियो वगु खाँ ब्याक दिल ।

वयकलं ख्वप नगरय् पुरातात्विक व सांस्कृतिक ह्युपा वगु खाँ ब्याकसे वांगु न्हयदा खय् १४५ गु सम्पदात ल्हवनय्

कानय् धुंगु खाँ ब्याकसे उपभोक्ता समिति पाखं यागु ज्याखय् स्थानीय स्रोत, साधन व सीप नपां गुणस्तर नपां थःगु धायगु भावना ब्वलानिगुलिं थुगु मोडलं विकास निर्माण व सम्पदा ल्यकः म्वाकः तय्गु ज्या जुयो च्वंगु खाँ ब्याक दिल ।

ज्या इवःसं बागमती प्रदेश, प्रदेश सुशासन केन्द्रया निर्देशक गीता गुरुडं ख्वप नगरपालिकां याडः वयो च्वंगु सम्पदा ल्यकः म्वाकः तय्गु ज्या इवः या खाँ कुल दिसे मेमेगु स्थानीय तहं नं सम्पदा ल्यकः म्वाकः तयो थुकिता आम्दानीया लुखा काथं हःनय् यंकय् मः धायो दिल । वयकलं जनप्रतिनिधिपिसं क्यंगु लाँपु काथं कर्मचारीपिसं ज्या छ्यलय् मः धायो दिल ।

उलेज्या ज्या इवःसं ख्वप नगरपालिकाया उपप्रमुख रजनी जोशी, प्रमुख प्रशासकीय अधिकृत वसन्त भट्टराई, प्रशिक्षक अलय पुरातत्त्व विभागया पूर्व महानिर्देशक भीम प्रसाद नेपाल व प्रदेश सुशासन केन्द्रया उपनिर्देशक विनोद विदारी पिसं नं न्वचु तयो द्यगु खः ।

जापानया ओइजुमी नगरप्रमुख तोसिआकी ख्वपय्

जेठ ३ गते



ख्वप नगरपालिकाया प्रमुख सुनिल प्रजापति नपां जापानया गुन्माप्रान्तया ओइजुमी नगरया नगरप्रमुख गुरायामा तोसिआकी जुं विहिवार ख्वप नगरपालिकाय् भायो नपालाडः दिल ।

नगर प्रमुख तोसिआकीया न्हयलुवाय् भःपुं प्रतिनिधिमण्डल पुचःता ख्वपय् लसकुस यासे नगर प्रमुख प्रजापति जुं ख्वपया सांस्कृतिक व ऐतिहासिक म्हासिडका पिब्वसे ख्वप देता सांस्कृतिक व शैक्षिक केन्द्र काथं ह्युयाय्गु तातुडः ज्या साडः वगु नपां ख्वपय चाहयू वैपुं देशं दुनय व देशं पिनयया पर्यटकपिन्ता मन ब्वसायकिगु थाय् जुयो च्वंगु दः धायोदिल ।

वयकलं नेपःदे व जापान नेगू दे तः भ्वखाचा ब्वय फःगु

जोखिमय् लाडः च्वंगु देश जुगुलिं भ्वखाचां अपलं स्यंकय् मफैगु काथं दय्केता जापानपाखं सय्के मःगु खाँ काडः दिल । अथेहे तः भ्वखाया इलय ग्वाहाली यागुलिं सुभाय देछायो दिल । फोहर थासय् लाकय्गु ज्याखय् अपलं ह्युयाय् धुंगुलिं स्वनिगः या फोहरथासय लाकयता जापान सरकारनपां खँल्हाबल्हायाय् दःसा देशता भिं जुइगु खाँ नं वयकलं धायोदिल ।

नपालाय्गु इवलय नगर प्रमुख तोसिआकी जुं नेगु नगरया दश्वी ग्वाहाली संयन्त्र दय्कः अनुभव कालबिल याय दःसा ज्यू धायोदिसे जापानया ओइजुमि नगर औद्योगिक नगर खः धायोदिसे हलिमय नां दांगु गाडी निर्माता कम्पनीत उगु नगरय् दःगु नं वयकलं खाँ ब्याक दिल ।

वयकले ७२ सालया तः भ्वखाचां दुःख ब्वगु इलय् थःगु नगर अलय थमनं नं ग्वाहाली याडागु खाँ काडः दिल ।

ओइजुमि सहर तस्कं सुरक्षित सहर खः अलय आना ५२/५३ गु देशया नागरिक पूं च्वडः च्वंगु खाँ ब्याकसे वयकलं थःगु पार्टीया नेतात थीथी आर्थिक अनियमितताया मुद्दात फयो वयो च्वंगु खाँ नं ब्याकसे थःगु सहर दकलय न्हःपा भेदभाव अन्त्य जुगु सहरया खाँ नं वयकलं धायोदिल ।

नपालाय् धुंकः प्रतिनिधि मण्डलया पुचः ख्वपया ऐतिहासिक अलय सांस्कृतिक महत्वया प्राचीन सम्पदात आना हे भायो स्वयो दिल ।

वर्ष उत्कृष्ट कासामिपिन्ता हानय् ज्या

जेठ ५ गते

नेपाल मजदुर किसान पार्टीया नायो भाजु, वरिष्ठ राजनीतिज्ञ नारायण मान बिजुक्छेँ (रोहित) या मू पाहाँल्य् खप नगरपालिकाया गवसालय वर्षया चवजःपुं कासामिपिन्ता यागु हानयज्या ज्याइवःसं न्वचु तयो दिसे मू पाहाँ बिजुक्छेँ जुं कासामिपुं दे रक्षा यायूता न्ह्याब्लेँ तत्पर जुयो चवनय् मःगु, प्रतिक्रियावादीतयसं मखुगु लायें यंक्य् योगुलिं सचेत जुयमःगु, कासा नपां देया संस्कृति, सांस्कृतिक सम्पदा ल्यंकः म्वाकः तयूता ग्वाहाली नपां समाज विकासया लागिं हज्याय् मः धायो दिल ।

बहजु धायोदिल ।

उपप्रमुख रजनी जोशी नगरपालिकां नेमकिपाया निर्वाचन घोषणापत्र काथं, स्वास्थ्य, शिक्षा, सुचुकुचु, कासा नपां आधाभूत आवश्यकता हदाय तयो ज्या साडः वयो नपां दायें दायें पतिकं खप नगरपालिकां कासाया धिंधिं बल्ला याडः वयो च्वंगू खौं ब्याकः दिल । अथेहे अपाडःगु दिवसया लसताय् वास्केटबलया धिं धिं बल्ला याडः वयागु खौं कुलदिसे कासामिपुं देया तिसा खः धायोदिल ।

खप नगरपालिकाया प्रमुख प्रशासकीय अधिकृत वसन्त

भट्टराई जुं कासा हज्याकयूता संघ, प्रदेश व स्थानीय तह दशवी मंकः कुतः जुयमःगु खौं ब्याकसे खप नगरपालिकां कासामिपिन्ता ग्वाहाली जुइगु काथं दायें दायें पतिकं ठवनय्कुथि ब्यागु व अन्तरनगर कासाया धिं धिं बल्ला याडः वगु खौं ब्याकः दिल ।

वडा नं. १ या वडाध्यक्ष नपां युवा तथा खेलकुद समितिया कजि श्याम कृष्ण खत्री खप नगरपालिकां शिक्षा, स्वास्थ्य, पर्यटन थें कासाता नं ध्यान तयो वडावडाय् खुल्ला ब्यायाम शाला तयो छिकोड व ठवनय्कुथि कासामिपिन्ता प्रशिक्षण ब्यू ब्यू वगु

खौं काडः दिल ।

भक्तपुर जिल्ला भलिबल संघया नायो विनोद चरण राय जुं खप नगरपालिकां कासामि हानय् ज्या नपां कासा ख्यलय् याडः वगु ज्या ब्वस्यलागु खौं काडः दिसे सम्मानित्त जूपुं कासामिपिनिगु लिचवः काडः दिल ।

ज्या इवःसं वडाध्यक्ष ४ या उपेन्द्र सुवाल युवा तथा खेलकुद समितिया दुजं समितिया दुजः रामसुन्दर बासी नं न्वचु तयो द्यूगु खः ।

ज्या इवःसं मू पाहाँ बिजुक्छेँ जुं हिंखुम्हा क्वछिनामिपुं, हिं न्हयगु कासाया चवजःपुं १७/१७ म्हा मिसापुं मिजपुं कासामिपुं १७ म्हा चवजःपुं स्यनामिपुं प्रशिक्षक कोर्स तःलाकपुं २१ म्हा प्रशिक्षकपुं, अन्तर्राष्ट्रिय पदक त्याकपुं ७ म्हा कासामिपिन्ता हानयज्या याडः द्यूगु खः ।



ज्या इवःसं नगर प्रमुख सुनिल प्रजापति जुं कासामिपुं देया हे सम्पति जुगुलिं राज्यं कासामिपिन्ता सुरक्षा व व्यवस्थापन याय् मः धायोदिसे अः कासामिपुं विदेशय् वाडः च्वंगुलिं अमिगु मन क्वसालिगु ज्या इवः त दय्के मः धायो दिल । खप नगरपालिकाय् कासाया पूर्वाधार कम जगु खौं ब्याकसे वयकलं राज्यं कासाया लागाय् छ्यलिगु लाय् नं नौ दूँ खय् हामः क्वफ्वाय्गु थें जक जुयो च्वंगुलि कुखिडः दिसे कासामिपिसं नं राजनीतिक खौं थुइकः देया सार्वभौमसत्ता स्वतन्त्रता अखण्डताया लागिं ल्वाय्मः धायोदिल ।

बागमती प्रदेश सभाया दुजः सुरेन्द्र राज गोसाईं जुं कासामिपिसं कासा नपां नपां समाजय हयूपा हयूता स्वयंसेवी भावनां ज्या सानय् मःगु राज्यं कासामिपिन्ता वास्ता मयाडः च्वंगु इलय खप नगरपालिका कासामि हानय् ज्या यागु च्वछाय

टेबुल टेनिस कभर्ड हल उलेज्या

जेठ ६ गते



नेपाल मजदुर किसान पार्टीयाछ्याञ्जे नपां संघीय सांसद प्रेम सुवाल जुं ख्वप नगरपालिका वडा नं १० बेखालय् च्वंगु न्हंगु दांगु बेखाल टेबुल टेनिस कभर्ड हल उलेज्या यासे मेमेथाय कासाया लागाय् भ्रष्टाचार जुयो च्वंगुलि चिन्ता प्वकसे सरकारया नीति व ज्या इवःखय् भ्रष्टाचार मयाकयता थजगु छुं ज्या इवः मरुगु खाँ काडः दिल । राजनीति गुब्ले नं फोहर मजुईगु खाँ काडः दिसे वयकलं देश व जनताता भिं यायगुलि इमानदार जुयो राजनीति याइपुं मनूतयता बेइमानी राजनीति याइपिसंयाडः फोहर धायो हःगु खाँ ब्याकसे राजनीति जनताया सेवा यायगु अवसर खः । पूँजीवादी व्यवस्थाय् उत्पादनया साधनत नेम्हा प्यम्हा मनु तयगु लाहातय जक लाइगुलिं जनतां दुःख सिइगुलिं समाजवादी व्यवस्था ह्यमःगु खः धायोदिल ।

ज्या इवः सं ख्वप नगरपालिकाया प्रमुख सुनिल प्रजापति जुं ख्वपय अः कमलविनायक लिबाली व बेखालय् याडः स्वंगु कभर्ड हल दःगु खाँ ब्याकसे ख्वप नगरपालिकां राष्ट्रिय व अन्तर्राष्ट्रिय कासामिपुं ब्वलांकयता तःलागू नपां दायँ दायँ पतिकं कासामि व स्यनामिपुं हानय्ज्या याडः वयो च्वंगु खाँ काडः दिल । वयकलं कासामिपुं अनुशासित जुयो देश व जनताया हकहित नपां कासा छ्यलय् ब्वस्यालाम्हा जुयो ह्य्यासे देया राजनैतिक खाँथुइक-सार्वभौमसत्ता ल्यंकः म्वाकः तयता ह्य्याय्मः धायोदिल ।

उप प्रमुख रजनी जोशीं निर्वाचन घोषणापत्रय् न्हिथाडा काथं शारीरिक व बौद्धिक विकासया निंतिं कासाता नं हृदाय तयो ज्या साडः वयागु नपां अपाङ्ग दिवसया लसताय मदिकक कासाया

धिधिबल्ला याडः वयागु खाँ काडः दिल ।

वागमती प्रदेश सभाया सांसद सृजना सैजु कभर्ड दःसेलिं हंगु पुस्ताता कासाखय् सालिगु, कासा मित्रताया लागिं नपां अन्तर्राष्ट्रिय लागाय् नं म्हासिइक बिइगु ख्यः राजनीतिशास्त्र व कटनीति शास्त्र नपा नं स्वापु दःगु विषय खः धायोदिल । कासाया लागाय् सरकारं ह्य्याकय् मफूगु ख्वप नगरपालिकां याडः च्वंगु ज्या च्वछाय् वहजु धायोदिल ।

राष्ट्रिय खेलकुद परिषदया वरिष्ठ प्रशिक्षक राजेन्द्र कपालीं ख्वप नगरपालिकां शिक्षा, स्वास्थ्यनपां कासाता नं हृदाय तयो ज्या साडः वगु च्वछाय वहजुगु, सरकार व खेलकुद परिषदं याय मःगु ज्या ख्वप नगरपालिकां याडः च्वंगुखाँ काडः दिल । अखिल नेपाल टेबुल टेनिस संघया नायो चतुरानन्द बैद्यं कभर्ड हलता राष्ट्रिय प्रशिक्षण केन्द्र काथं ह्य्याय फँगु नपां कासामिपिसं समाजय ह्यूपा ह्यता ज्या सानय् मःगु खाँ नं ब्याकः दिल ।

भक्तपुर जिल्ला भलिबल संघमा नायो विनोदचरण राय जुं ख्वपय् ख्यँ बल कासाय् अपलसिया मन क्व सःगु खाँ काड दिल ।

ज्या इवःसं वडानं १ या वडाध्यक्ष नपां युवा तथा खेलकुद समितिया कजि श्याम कृष्ण खत्रीं ख्वप नगरपालिकां दायँ दायँ पतिकं च्वजःपुं कासामि व कासा स्यनामिपिन्ता हानेज्या याडः वगु खाँ कुल दिसे वडावडाय् खुल्ला व्यायामशाला व ब्वनय्कुथि कासा स्यनामिपुं व्यवस्था याडः तःगु खाँ काडः दिल ।



ज्या इवःसं वडाध्यक्ष पुं रबिन्द्र ज्याख्व (९) लक्ष्मी प्रसाद ह्योमिखा (१०) व ख्वप नगरपालिकाया प्रमुख प्रशासकीय अधिकृत वसन्त भट्टराई जु पिसं नं न्वचु तयो द्यूगु खः ।

खूप तिलगङ्गा आँखा अस्पताल न्हूंगु भवनं सेवा न्ह्याकल

जेठ ६ गते

नेपाल मजदुर किसान पार्टीया नायो भाजु नारायण मान बिजुक्छें (रोहित) जुं खूप तिलगङ्गा आँखा अस्पतालया कार्यालय उलेज्या याडः दिसे खूप नगरपालिका देया दकलय चिच्याहांगु नगरपालिका जूसां शिक्षा, स्वास्थ्य, सम्पदा पुनः निर्माण नपां थी थी लागाय् थुगु नगरपालिकां याडः च्वंगु योगदान ब्वस्यलागु खः धायोदिल ।

खूप देशं खूपया जनताया लागिं जक मखुसे देशां देछिया जनताता मःकाथं सेवा सुविधात ब्यू ब्यू वयो च्वंगु खाँ ब्याकसे आँखा अस्पतालं गरिव जनताया निःस्वार्थ सेवा जुइगुलि विश्वास प्वंक दिल ।

नायो भाजु बिजुक्छें जुं अस्पतालं अपलं जनताया सेवा जुइगु काथं याय् मःगु नपां जनतां थुइगु भाषं अःपुक सेवा बिय फःसा बिरामी पिन्ता अःपुइक खाँ ब्याकसे खूपय थःगु कार्य क्षेत्र द्यकगुलिं तिलगङ्गा आँखा अस्पतालता सुभाय देछःसे अस्पतालया सेवा सुविधात ईलं फ्वं काथं अज बांलाक यंक्य मःगुलि बः याडः दिल ।

ज्या इवः या सभानायो नपां खूप नगरपालिकाया प्रमुख सुनिल प्रजापति जुं स्थानीय जनतां अःपूक सेवा काय थ फः धायगु मतिं तिलगङ्गा व हेटौडा आँखा अस्पतालय स्वयो दांकः भिंकः सेवा वियगु तातुडः खूप नगरपालिकां खूप तिलगङ्गा अस्पताल चाय्कःगु खः धायोदिसे १८ दा हाँ खूपया चिच्याक्वगु क्वथां न्ह्याकगु आँखा केन्द्र अः खूप नगरपालिका पाखं चाय्कः तःगु खूप अस्पतालं सुविधां जःगु भवनं सेवा न्ह्याकगु खूपया लागिं गौरवया खाँ खः धायोदिसे खूप तिलगङ्गा आँखा अस्पतालं

ब्वनय्कुथि आँखा शिविर, त्वाल्य् त्वाल्य् आँखा शिविर न्ह्याक वयो च्वंगु खाँ काडः दिल ।

उपप्रमुख रजनी जोशी खूप नगरपालिकां जनताया सेवा सुविधाया लागिं समाजवाद उन्मुख ज्या इवः याडः वयो च्वंगु उकिं शिक्षा नपां स्वास्थ्यता नं हृदाय तयो न्हिथानय वह जुइक ज्या याडः वगु खाँ कुल दिल ।

तिलगङ्गा आँखा अस्पताल येँ या कार्यकारी निर्देशक डा. सन्दुक रइत जुं ऐतिहासिक अलय सांस्कृतिक नगरया जनताया सेवा याय् दःगुलिं गौरवया अनुभूति जुगु खाँ ब्याकसे आर्थिक व सामाजिक काथंया छुं नं समस्यां विरामीया मिखाया उपचार याय मखाना धाय म्वायक थुगु अस्पतालं म्हवचा धेबां बांलागु, भिंगु सेवा वियमः धायोदिल ।

खूप अस्पतालया निमित्त मेडिकल डाइरेक्टर डा. मजेश प्रताप मल्लं खूप अस्पतालं बिइगु सेवा सुविधात अझ बांलाक यंक्यगु खाँ ब्याकसे अस्पतालं जनमुखी ज्या यायां ३६५ न्हँ हे जनताया सेवासं हज्याडः ज्या याडः वगु खाँ काडः दिल ।

अथेहे खूप तिलगङ्गा आँखा अस्पतालया प्रमुख डा. सुदिप राजमण्डारी जुं लसकुस न्वचु, खूप तिलगङ्गा आँखा अस्पतालया इन्चार्ज डा. धिरज अधिकारी जुं अस्पतालया प्रगति प्रतिवेदन, खूप नगरपालिकाया प्रमुख प्रशासकीय अधिकृत वसन्त भट्टराई जुं सुभाय देछायो द्यगु खःसा खूप नगरपालिका वडा नं ९ या वडाध्यक्ष रविन्द ज्याख्व नं न्वचू तयो द्यगु खः ।

खूप नगरपालिकापाखं चायक तःगु खूप अस्पतालया प्यंगू तल्लां खूपं तिलगङ्गा आँखा अस्पतालया सेवा थौं निसें न्ह्याकगु जुल ।



थःगु अनुभवं सय्क भीगु हे पहलं जनता ग्वाकः हज्याय् फःसा तः लाई

जेठ & गते



नेपाल मजदुर किसान पार्टीया नायोभाजु नारायणमान बिजुक्छे (रोहित)या मू पाहाँलय 'खप नगरपालिकाया जनप्रतिनिधि पिनगु कार्यकाल नेदा फुत' धाय्गु ज्या इवःया लसताय ३० दा सेवा याय धुंकपुं कर्मचारी पिनता दीर्घ सेवा सम्मान व नगरपालिकाय् ज्या साडः च्वंपुं कर्मचारी मध्ये च्वजः पुं उत्कृष्ट कर्मचारी पिनता हानय् ज्या नं याडः दिल ।

मू पाहाँ बिजुक्छे जुं खप नगरपालिकां थःगु तुतिखय् दानय् फय्के मःगु, संस्कृतिया विकास मदिव्क हज्याय मःगु, जनताता छप्पा छधियाडः, ग्वाकः हज्यायमःधायो दिल ।

विदेशिया सिद्धान्त व विचः थःगु देशय गुलि छ्यलय् फै थुइकः, ल्ययो हज्यायमः धायोदिल । वयकलं खप देता टेस्टट्युव काथं स्वयमः धायोदिल ।

थःगुहे अनुभव छ्यल थःगु हे पहलं जनतात ग्वाकः हज्यासा तः लाइगु विश्वास प्वकसे वयकलं भीसं भीगु पहः त्वतय मज्जु धायोदिल ।

ज्या इवःया सभानायो नपां खप नगरपालिकाया प्रमुख सुनिल प्रजापति जुं नेपःया संविधान घोषणा यागु च्यादा फ्यु धुंकानं देशय संघीयता बांलाक छ्यलय् मफूगु खौं कुलः दिसे स्थानीय तहतयसं संघ व प्रदेशं विइगु समानीकरण अनुदान अप्व तयमः दक माग याडः च्वंगु इलय भन अप्वः सशर्त अनुदान अप्वयकः संघ व प्रदेशं स्थानीय तहता थःगु लाहातय् म्हुँछिडः तय तांगु खौंया कुं खिडः दिसे जनसंख्या व क्षेत्रफलया लिधंसाय् स्थानीय तहता बित्त आयोगया सिफारिसय अनुदान बिइगु संवैधानिक ब्यवस्था दःसां चालु आ.व. २०८०/८१ या बजेटय् वागमती प्रदेश खप नगरपालिकाता सम्पूरक अनुदान व विशेष अनुदानया नामय बजेट हे छ्वयो महःगुलि आपत्ति प्वकसे विस्कं बिचः तैगु पालिकातयता ग्वाहाली मयाइगु वागमती प्रदेश सरकारया नीति आपत्तिजनक जुगु खौं काडः दिल ।

सरकारता संविधानया अखः, पक्षपात व महिताया ज्या याय्गु छुट मरुगु खौं न्हिथांसे प्रमुख प्रजापति जुं स्थानीय तहता

मा.वि. तगितकया शिक्षाया अधिकार संविधानं हे बियोः तःगु इलय जिल्ला शिक्षा कार्यालयता हकनं म्वाकः ह्यतांगु प्रतिगामी पला खः धायो दिल ।

वागमती प्रदेश सभाया दुजः सुरेन्द्र राज गोसाईं जुं स्वगुं तह्या सरकारं थःगु नीति व ज्याइवः या समीक्षा, उपलब्धी व सफलताया खौं जनताया दश्वी छलफल याय्मः धायोदिसे ६० दौतक अमेरिकाया नाकाबन्दी फयो च्वम्हा क्यूवा व प्रजग कोरियाया इतिहासं नेपालय सय्केमःगु अलय भौतिक विकास जक विकास मधःसें नगरया बाँला (सौन्दर्यकरण) प्राकृतिक, हरियाली याडः तयगुलि नं विचः याय्मः धायोदिल ।

वयकलं वनयकुथिनिसें हे ज्या इवः न्ह्याकय् मःगु खौं व्याकसे शिक्षक वनामि कर्मचारी केन्द्रीत ज्या इवः नगरपालिका व वडां बःयाय् मःगु नपां वनामिपिनगु पोषणया अवस्था वनयकुथिता मःकाथंया अनुदान, शिक्षक पिनगु क्षमता अभिवृद्धिया लागिं तालिम, शिशुस्याहार केन्द्रत ताँ ताँ वानय्मः धायोदिल ।

नगरपालिकां नगरबासीपिनता हज्याडः ग्वाकय्गु ज्या मदिव्क न्ह्याकय् मःगु अब्यवस्थित लाँ दयकः च्वंगु वातारण प्रदुषण थजगु लिनं विच याय्मः धायोदिल ।

राष्ट्रिय योजना आयोगया दुजः रामकुमार फुयाँल जुं शिक्षा, स्वास्थ्य, भीगु थःगु मौलिक संस्कृति ल्यंकः म्वाकः तय्गु इवलय् खप नगरपालिकाया ज्याभ्व च्वः छाय बहजगु खौं व्याकसे सरकारया संबैधानिक अधिकार दुनय च्वडः राष्ट्रिय योजना आयोगं थी थी नगरपालिकात नपां मंकः ज्या साडः अनुदानत छ्वयो च्वडागु खौं व्याकसे दे याता लाँपु क्यनिगु, ज्या म्हुँवचा इलय ब्वस्यलागु व डालकाय बहगु ज्या सांगु खौं व्याकसे वयकलं आयोग पाखं याय्मःगु ग्वाहाली व मंकःज्या याय्ता न्ह्याब्लें तयार दःगु खौं काडः दिल ।

भक्तपुर जिल्लाया प्रमुख जिल्ला अधिकारी रोशनी कुमारी श्रेष्ठ ७५३ गू स्थानीय तह मध्ये खप नगरपालिकां थःगु धिसिलागु अलय गर्व याय् लाइकगु काथं धस्वाडः च्वंगु खौं व्याकसे राजनीतिक सृदृढीकरणं देया फुक्क समस्या ज्यंकय फैगु खौं व्याक दिल । वयकलं सभ्य व परिष्कृतपुं जनप्रतिनिधिपिनि दश्वी च्वडः ज्या सानय् दःगुलिं तस्कं अःपुगु खौं व्याकसे नगरपालिकां सुशासन जुइगु काथं थःगु ज्या इवः त पिताब्वयो वगु खौं काडः दिल ।

खप नगरपालिकाया उपप्रमुख रजनी जोशीजुं लसकुस न्वचु तयो दिसे खप दे ता अझ बांलाक हज्याकय्ता सच्छिदा लिपाया खप दे साफूता लाँपु क्यनिगु साफु काथं कायो हज्याडः, च्वडागु खौं काडः दिल ।

उगु ज्या इवःसं खप नगरपालिकाया प्रमुख प्रशासकीय अधिकृत वसन्त भट्टराई जुं सुभाय देछायो द्यगु खःसा ९ या वडाध्यक्ष रविन्द्र ज्याख्वं नं न्वचु तयो द्यगु खः ।

जनप्रतिनिधिपिनिगु बहाली नेदा फूगुयाता लिफः स्वयाबलय

जेठ ७ गते

‘भीसं भौतिक विकास जकमखु जनताता सैद्धान्तिक व वैचारिक रूपं नं ग्वाकः छप्पा छधि याडः यंकय मः ।’

ख्वप नगरपालिका वडा नं. ९ कार्यालयं सोमवार ग्वसःग्वगु ख्वप नगरपालिकाया जनप्रतिनिधिपिनिगु बहाली नेदा फुगु, याता लिफः स्वयगु ज्या इवः सं ख्वप नगरपालिका या प्रमुख सुनिल प्रजापति जुं न्वचुतयो द्यूगु खः । न्हूगु पुस्ता वा ल्यासे ल्याम्हो पिन्ता राजनीतिक चेतना बिय मफूगुलिं पश्चिम बङ्गालय अपलं विकास जूसां कम्युनिस्ट पार्टी बमलाडः वांगू खाँ काडः दिसे छगू छगू पुलांगु अनुभवत न्हूगु पुस्तायानितिं घ्वासा जुइगुलिं पुलांगु इतिहास व अनुभव न्हूगु पुस्ताता कानय मःगु खाँ काडः शत्रु याइगु बयबयपाखं सचेत जुयमः धायोदिल ।

ख्वप नगरपालिकां नेपः या संविधानया दुनय च्वडः समाजवादी मोडेल काथं ज्या साडः च्वंगु खाँ ब्याकसे शिशु स्याहार निसे कलेजत चायकः तःगु, स्वास्थ्य, सम्पदा, सुचुकुचु थजगु ब्वस्यलागु ज्या जुयो च्वंगु खाँ ब्याकः दिल ।

भीगु थःगु पहः मौलिकता ल्यंकः तयता, ल्हवनय-कानय ज्या बल्लाक-भिकः दानयता थःगु धायगु मति ब्वलांकयता, थः थाय दःगु स्रोत व साधन छ्ययकयता नपां थःथाय दःगु श्रम, सीप छ्ययकः लाहातय ज्या बियता छगू छगू निर्माणया ज्या उपभोक्ता समिति पाखं ज्या सांक च्वडागु खाँ न्हि थासे वयकलं ख्वप दे देश विदेशया स्वापु दः पिनिगु सयके सिइकेगु थाय जुयो च्वंगु खाँ ब्याकः दिल ।

विकास यायगु खःसा स्थानीय जनताया ग्वाहाली मदयकः मगागु खाँ ब्याकसे वयकलं वागमती प्रदेश सरकारं संविधानं धायो तः काथंया विशेष अनुदान मब्यूसिं पक्षपात यागु खाँ न्हि थाडः दिल ।

ख्वप नगरपालिका वडा नं ९ या वडाध्यक्ष रबिन्द्र ज्याख्व जुं वडाया थीथी ज्या इवःत काडः दिसे अः वैगु दायँ छु छु यायमालिदक सुभावाव फवडः दिल । वयकलं ख्वप अस्पतालया पुलांगु भवन दाडः च्वंगु, पाइखाना, ब्रम्हायणी देगः लिक्क ल्हवनयगु ज्या त्वनयगु नाः इडः च्वडागु, पीच, फलय ब्लकं सिउगु, स्वास्थ्य शिविर, परम्परागत कासा न्ह्याकगु, तालिम, छात्रवृत्ति, साफू पिथना थजगु थीथी ज्यात काडः दिल ।

पूर्व अध्यक्ष कृष्ण भक्त लवजुं पार्टीया सिद्धान्त व बिचः काथं निर्वाचनय ब्वति कायो पार्टीया घोषणापत्र व जनताया सल्लाहकाथं जनप्रतिनिधिपिसं ज्या साडः वगु खाँ ब्याकसे घोषणापत्र ज्या सानयगु लाँपु खः धायो दिल ।

वडाया दुजः इन्द्र बहादुर प्याथं लसकुस याडः द्यूसे व्यायामशाला, छिकोडः, स्वास्थ्य शिविर, कम्पोष्टमल, चा जाँचय यायगु पुसा इडः ब्यूगू खाँ काडः दिलसा मेम्हा वडाया दुजः छोरीमैयाँ सुजखुं ज्या इवः याय मःगु खाँ काडः दिल ।

अथेहे प्राविधिक अर्हत बज्राचार्य आ.व. २०७९/८० व ८०/८१ सं वडाया जुगु ज्या, वडाया नर्स दिव्या सुवाल छँ छँ नर्सिड स्वास्थ्यसेवाया खाँ काडः दिल ।



मेलम्ची नगरपालिकाया उप प्रमुख प्रधान ख्वप नगरपालिकाया

जेठ ९ गते

सिन्धुपाल्चोक मेलम्ची नगरपालिकाया उप-प्रमुख उमा प्रधानया न्ह्यलुवाय न्यायिक समितिया पदाधिकारी पिसं ख्वप नगरपालिकाया भ्नायो ख्वप नगरपालिकाया प्रमुख सुनिल प्रजापति व उप प्रमुख रजनी जोशी नपालाडः दिसे नेगू नगरपालिकाया शिक्षा, स्वास्थ्य, सम्पदा ल्हवनय-कानय, न्याय समितिया कार्य सम्पादन नपां थी थी विषयया खँलाबल्हा जुल ।



उगू पुचःता सांस्कृतिक नगरी ख्वप नगरय लसकुस याडः दिसे नगर प्रमुख प्रजापति जुं ख्वप दे कला संस्कृति ल्यंक म्वाकः तगु, जीवित संग्रहालय काथं म्हासिइका पिब्वयो वयो च्वंगु खँ व्याकसे ख्वप दे अफ्र बांलाकः व्यवस्थित याडः ह्छ्याय्ता जनप्रतिनिधिपिसं ज्या साडः च्वंगु दः धायोदिल ।

न्हँ न्हँगु प्रगतिया लुखा चाय्केता संघर्ष याय्मः

जेठ १० गते

वागीश्वरी कलेज कमल बिनायकया गवसालय जूगु 'ज्यासानयबलय वड्गु तनाव व्यवस्थापन' या स्वन्ह्या कार्यशाला गोष्ठी ख्वप नगरपालिकाया प्रमुख सुनिल प्रजापति जुं उलेज्या यासे तनाव मरुपुं मनु मदैगुलिं उकिता व्यवस्थापन याडः हज्याय फःसा तः लाइगु खँ व्याकसे न्ह्याथिन्योगु तनाव तानं चुनौति काथं कायो व्यवस्थापन याय् फःसा सफल जुईधायोदिल । भक्तपुर क्यान्सर अस्पताल, सल्लाघारीया ९९ रोपनी, सैनिक क्याम्पस दुनय्या रानीपुखु तनाव फयो हे सफल जुगु खँ व्याकसे वयकलं धैर्य याडः तनाव व्यवस्थापन याडः इमानदार जुयो देश व जनताया सेवाखय् समर्पित जुयो थःगु तुतिखय दाडः हज्याय फःसा तनाव मजुइगु, मेगु थासय याय्पुं थाना स्वः वगु व भ्नीसं नं अमिपाखं सय्के दःगु खँ काडः दिल ।

वडाध्यक्ष रबिन्द्र ज्याखवं तनाव व्यवस्थापन प्रगतिया लिधंसा खः धायो दिसे जिम्मेवार व्यक्तिया तनावं सेवाग्राही पिन्ता बाँमलागु लिचवः लाकय् मज्यू धायो दिसे अभिभावक पिनि आदर्शपात्र शिक्षकपुं जुइगुलिं ह्थाय् मचःसे समस्या ज्यंकय् मः ।

शिशु स्याहार केन्द्र निसे कलेजतक चाय्क च्वंगु ख्वप नगरपालिका देया न्हांगु स्थानीय तह खः धायोदिसे पारदर्शी ढंगं ज्यासाडः जनताया मन त्याकः वगु खँ नं वयकलं काडःदिल ।

मेलम्ची नगरपालिकाया उपप्रमुख उमा प्रधानं ख्वप नगरपालिकाया थःगु तुतिखय दानयगु ज्या मेपिसं नं सय्के मःगु, थःपु नं ह्थाय् चायागु खँ काडः दिसे ख्वप नगरपालिकां नगरता उथिं ग्यंक विकास याडः च्वंगु च्वछाय् बहजु धायो दिल ।

वयकलं ख्वप नगरपालिकापाखं चाय्कः तःगु ख्वप इञ्जिनियरिङ्ग कलेज व मेमेगु शैक्षिक संस्था तस्कं बां बांलागु ज्या याडः च्वंगु खँ स्वाडः दिसे ख्वप नगरपालिकाया ज्या स्वस्वं मेलम्ची नगरपालिकाया ज्या न्ह्याकः वयागु खँ नं वयकलं काडः दिल ।

नपालायगु इवल्य ख्वप नगरपालिकाया उपप्रमुख रजनी जोशी जुं ख्वप नगरपालिकाया न्यायिक समितिया कार्य सम्पादन या खँ व्याकसे ख्वप नगरपालिका सकलसिया सय्के सिइकेगु थाय् जुयो वगु खँ काडः दिल ।

उब्ले मेलम्ची नगरपालिकाया न्यायिक सहजकर्ता अस्मिता अर्याल, सीतामाया तामाड, समितिया दुजः श्रीकृष्ण श्रेष्ठ, सामुदायिक मेलमिलाप सेवाकेन्द्र नगर सञ्जालया कजि विष्णु प्रसाद ढुङ्गाना, वासुदेव कटुवालपुं नं भःगु खः ।



तनावं ल्वय नं वनय् योगुलिं आलोचना आत्मालोचनाया संस्कार दय्के फःसा तनाव व्यवस्थापन याय् फँगु खँ काडः दिल ।

कलेजया प्राचार्य धनकुमार श्रेष्ठया सभानायोलय जूगु उगु ज्या भ्वःसं कलेजया कजि ज्ञानसागर प्रजापति, वागीश्वरी कलेज अफ म्यानेजमेन्टया प्राचार्य कृष्ण प्रसाद धन्छा, कलेजया अबिना श्रेष्ठ व विकल प्रजापतिं नं न्वचु तयो द्यूगु खः ।

कार्यशाला सं डा. ऋषिराज बाराकोटी व उत्तम आचार्य तनाव व्यवस्थापनया बारे मः काथंया सहजीकरण याडः द्यूगु खः ।

स्याङ्जा फेदीखोला गा. पा. या जनप्रतिनिधिपुं ख्वप नगरपालिकाया

जेठ ११ गते

ख्वप नगरपालिकाया प्रमुख सुनिल प्रजापति जु नपां स्याङ्जा फेदीखोला गाउँपालिकाया उपाध्यक्ष देउकुमारी गुरुड नपांया ३२ म्हा सिया पुचः ख्वप नगरपालिकाय भ्नाल ।



अवलोकन भ्रमणया इवल्य् ख्वप नगरपालिकाया प्रमुख सुनिल प्रजापति जुं सांस्कृतिक नगर ख्वपय् लसकुस याडः दिसे ख्वप नगरपालिकां शिक्षा, स्वास्थ्य, सम्पदा ल्यंकः म्वाकः तयो तःगु, सुचुकुचुता हृदाय तयो समाजवाद उन्मुख ज्या याडः च्वंगु

खाँ काडः दिल ।

उप प्रमुख रजनी जोशी ख्वप नगरपालिकां २०७२ सालया तः भवखाचां स्यंकः थुडः ब्युगु सम्पदात उपभोक्ता समितिपाखं पुलांगु पहलय हे ल्हवनय् कानय् दानय् धुंकगु खाँ ब्याकसे नागरिक पिनिगु बुसां निसें मसितलय्या जिम्मेवारी सरकारं कायमःगु समाजवादी भावना कः घाडः ख्वप नगरपालिकां शिशु स्याहार निसें विश्व विद्यालय तगितकया शिक्षा दांकः भिंकः नगरपालिकां बियो वगु खाँ काडः दिल ।

ज्या इवः सं प्रमुख प्रशासकीय अधिकृत वसन्त भट्टराई जुं लसकुस याडः दिसे ख्वप नगरपालिकां संविधानया मतिकथं स्वायत्तताया अभ्यास जुयो च्वंगु खाँ काडः दिल ।

ज्या इवः लिपा ख्वप नगरपालिकाया प्रमुख प्रजापति जुं ख्वप नगरपालिकाया पिथनात व लोकंहवागु म्हवय्खा इयो मतिनाया चिं काथं लः ल्हाडः दिल । अथेहे फेदीखोला गा.पा. या उप प्रमुख गुरुड जुं प्रमुख प्रजापति जुयाता गाउँपालिकाया पिथनात लः ल्हाडः दिल ।

ज्या इवः लिपा वयकपुं ख्वप नगरपालिका पाखं चाय्कः तःगु ख्वप अस्पताल व ख्वप कलेज स्वः भ्नाल ।

टी ट्वान्टी क्रिकेट टूर्नामेन्टया ट्रफी पलिस्था

जेठ ११ गते

ख्वप जिल्ला क्रिकेट संघया ग्वसालय जेठ १२-१९ गते तक जुडुगु मिसातय्गु व मिजंतय्गु एन.सी.सी. आमन्त्रित स्वनिगः ब्यागु टि ट्वान्टी क्रिकेट टूर्नामेन्टया ट्रफी पलिस्था नपां जिल्ला स्तरीय महिला टिमया जर्सी पिताब्वज्या जुल ।

ट्रफी निःस्वांसे ज्या इवःया मूपाहाँ ख्वप नगरपालिकाया प्रमुख सुनिलप्रजापतिं टूर्नामेन्टया सफलताया भिंतुना देछासे कासा अनुशासित व निष्पक्ष ढङ्गं क्वचाय्के मः धायोदिल ।

ख्वप नगरपालिकां कासा छ्यः तः ब्याकय्ता कासाया पूर्वाधार दय्केगुलि बः यासे थी थी कासाया धिं धिं बल्ला ग्वसः ग्वयो वगु खाँ काडः दिल ।

क्रिकेटता राज्यं हृदाय तयो मस्वगु खाँ ब्याकसे प्रमुख प्रजापति जुं रंगशाला दय्केगुलि विदेशी संस्थाया ग्वाहालीं मखुसैं सरकारया लाय् छ्यलः दय्के मः धायो दिल ।

भक्तपुर जिल्ला क्रिकेट संघया नायो मनिषराज पाण्डे क्रिकेटया लिपा थ्यंकः हज्याक यंकय्ता नपां कासामिपिन्ता



काथं छिंगु दबु दय्क बिय्गु मतिं कासाया धिंधिं बल्ला ग्वसः ग्वयागु खाँ काडः दिसे भक्तपुर क्रिकेटया लागाय् नं सम्भावना दः गु जिल्ला खः धायोदिसे क्रिकेटया कासा हज्याकय्ता ख्वप नगरपालिकापाखं नं ग्वाहाली याडुगु विश्वास प्वंकः दिल ।

ज्या इवः सं टूर्नामेन्ट निर्देशक सन्तोष शाक्य जुं कासाया धिंधिं बल्लां फुक्क कासाया लागाय् बः जुडुगु नपां कासामिपिनिगु मन क्वसाडुगु खाँ काडः दिल ।

दुरुष्व, मचाछें, तःपुगु आन्द्राय् जुइगु क्यान्सरया शिविर

खप नगरपालिका वडा नं २ या ग्वसालय् दुरुष्व, मचाछें व तःपुगु आन्द्राय् जुइगु क्यान्सरया स्वास्थ्य शिविरसं खप नगरपालिकाया प्रमुख सुनिल प्रजापति जुं स्वास्थ्यया लागा संवेदनशील जूगुलि जनताता स्वास्थ्य चेतना वियगु तातुड वडा वडाया स्वास्थ्य शिविर याडः वगु शिक्षा हृदाय् तयो जनप्रतिनिधिपिसं ज्या साडः वगुलिं खप दे थौ या अवस्थाय थ्यंगु खः धायो दिल ।



वडाध्यक्ष (२) हरिप्रसाद बासुकलाया सभानायो लय जूगु उगु सभासं श्यामसुन्दर मातां, रोशनराज तुइतुई, रत्नकाजी

नायभारी, मञ्जुमैयाँ लाखाजु व डा. पुनम थापां न्वचु तयो द्यगु खः ।

पुरातात्विक सम्पदा व्यवस्थापन सम्बन्धी अभिमुखीकरण चालु



खप नगरपालिकाया उप प्रमुख रजनी जोशी प्रदेश सुशासन केन्द्र वागमतीया ग्वसालय जुगु स्थानीय तहया पुरातात्विक सम्पदा, संस्कृति व पर्यटन स्वइपुं पदाधिकारी व पुरातात्विक सम्पदा व पर्यटन शाखाय् ज्या सानिपुं कर्मचारीपिनिगु लागिं पुरातात्विक सम्पदा व्यवस्थापन सम्बन्धी अभिमुखीकरण ज्या इवः सं जेठ ९ गते खप नगरपालिकाया विशेषताया प्रस्तुतिकरण पिठ्वयो दिल । खप नगरपालिकां तःभवखाचां लिपा १३४ गः सम्पदा ल्हवनय कानय याय् धुंकगु खाँ थाना निहथानय् बहजु ।

निरीक्षण

खप नगरपालिका वडा नं. ८ लिबाली आवास योजनाय् जुयो च्वंगु लाँ पीचया ज्या स्व भ्नायो दिसे खप नगरपालिकाया प्रमुख सुनिल प्रजापति जु ।



खपय् भ्रमण

चीन, बंगालादेश, भारत, मंगोलिया, भियतनाम व रसियाया विज्ञपुं सोभियत संघ व रसियां उच्च शिक्षा कायो वपुं खुकगु एसियन भेटघाट सम्मेलन क्वचाय्क खपया सम्पदा लागाय् जेठ ६ गते भ्रमण याडः द्यगु खः । थ्यं मथ्यं ५० म्हा तिया पुचः ता खप नगर पालिकां नगरपालिकाया पिथनात व तका तपुली, पुतु म्हिचाबियो लसकुस यागु खः ।



वर्षया उत्कृष्ट कासामिपुं हानय् ज्या

(२०८१ जेठ ५ गते)



मेलम्ची नगरपालिकाया जनप्रतिनिधि स्वप नगरपालिकाय

(२०८१ जेठ ९ गते)



स्वप तिलगङ्गा आँखा अस्पताल न्हँगु भवनं सेवा सुरु
(२०८१ जेठ ६ गते)



बेखाल टि.टि या कर्मर्ड हल उलयज्या
(२०८१ जेठ ६ गते)

